

LIJE'E SAN PABLO AL TE'A LINIŁ'EPOLA' LAPIMAYE LEFOT'ŁEPOŁTSI LIŁYA' CORINTO

¹ Iya' ninPablo, Jesucristo ałjoc'ipa ca'eła' lanic' lalapi'ipa. Toliya iya' nin'apóstol, epaluc Jesucristo. Tołta'a lixplic'epa ŁanDios. ² Iya' jouc'a łaipima Sóstenes linił'elhuo', ałnonilhuo' imanc' lefot'łepolhuo' ŁanDios jilpe liłya' Corinto. Imanc' joupa epenufpolhuo' Jesucristo. Toliya i'ipolhuo' ixanuc' ŁanDios. Iłque joupa imetsaicopolhuo' i'huexi. Jahuay łalpimaye nojoc'ipá Jesucristo, ni petsi lomana', ałnonila' jouc'a. Małque Jesucristo ałPoujna, illanc' iłniya.

³ ¡Cał'Ailli' ŁanDios jouc'a łalPoujna Jesucristo titoc'itsolhuo', tipac'e'etsolhuo' lołpicuejma'!

⁴ Itine itine cax'najtsi'i łainenDios acueca' itoc'ipolhuo', ipaxnepolhuo' imanc' lepenufpolhuo' Jesucristo. ⁵ Cax'najtsi'i xonca ac'a loluyalaicopa imanc' lepenufpolhuo' Cristo. Juaiconapa ac'a loluya'apa litaiqui'. Ac'a olapenuf'me iłe litaiqui', ołcuejpá. ⁶ Tołta'a li'ipolhuo' lijoupa lolapenufpa łalıtaiqui' łalpalaicopa Cristo. ⁷ ŁanDios ipaxnepolhuo' acueca'. Jahuay lapi'ipola' lixanuc' joupa epi'ipolhuo' imanc'. Itsiya oł'huaijma ticuaiconanni łalPoujna Jesucristo. ⁸ Iłque ti'hua titoc'i'molhuo' aimolanajyacołtsi al c'a cane. Ticuaiconanni łalPoujna Jesucristo

aimitac'uinyacolhuo' cajunac'. ⁹ Tołta'a ti'e'ma LanDios. Itque tenant'hi litaiqui', aimifellaique. Joupa ijoc'ipolhuo' tonłejmale'me hi'Hua, łatPoujna Jesucristo.

¹⁰ Unc'aipimaye, caxahue'elhuo' tołspic'ete ti'łta' ac'a loł'ejma', tetentłcocola' Jesucristo. Camilhuo': Aimolfuli'i'moltsi cataiqui', aimolixtuc'o'moltsi. Toł'etsoltsi anuli lołpicuejma', anuli lołtaiqui'. Aimolanajcona'moltsi ocuena ocuena lipicuejma'.

¹¹ Unc'aipimaye, lapimaye nomana' lejut'ł Cloé tinescolhuo' imanc', ticuayi tołfuli'iyoltsi cataiqui'.

¹² Joupa aicuejpa loł'ejma'. Hualca imanc' tołcuayi: "İllanc' ałcuxenga' Pablo, itque lihuejyi". Ocuenaye ticuayi: "Lihuejyi Apolos". Ocuenaye ticuayi: "Lihuejyi Cefas". (Itque aPedro.) Locuenaye ticuayi: "İllanc' lihuejyi Cristo".

¹³ Itsiya quicuis'elhuo', camilhuo': ¿Te tipa'a axpela' lan Cristo? ¿Te iya' ninPablo lapal't'ingimpa lancruz? ¿Te iya' nailonc'e'epolhuo' lołjunac' imanc'? ¿Te ma mał'huaiyinge iya' ninPablo epo'icompolhuo'? ¹⁴ Cax'najtsi'i LanDios iya' nij naitsi imanc' łainepo'ipa. Ma le'a nepo'ipola' Crispo y Gayo. Locuenaye imanc' aicainepo'ila' iya'. ¹⁵ Tołta'a aimi'iya molnesyacu imanc': "Iya' nihuequi Pablo, itque lapo'ipa". A'i. Nij naitsi nonesya tołta'a.

¹⁶ Linca nepo'ipola' lapimaye nomana' lejut'ł Estéfanas. Aicaixina', aica'njuuaitsi ja'ni nepo'ipola' ocuenaye o a'i. ¹⁷ Cristo lummecopa cuya'atsi Lataiqui', ite loya'apa al c'a lixpicepa LanDios. Aicalu'ic': "Tapo'iyaletsi". Iya' a'i nincueca' comxi cataiqui'. Cristo aical'e'e tołta'a.

Ipic'a ti'íta' quiłsina' te ts'i'ic' al cuecaj li'ipa jilpe lancruz, tixingufcole jilpe hilunxajma'.

¹⁸ Lan xanuc' ts'ítaic' liłjunac' aiqilcueca li'ipa jilpe lancruz. Ticuayi: “Amac'ta cataiqui' iłiya”. Il-lanc' a'i. LanDios alunlu'enga', tołta'a alsinyi acueca' cataiqui' iłiya, alsingufcoyi al cueca' la'eponga' LanDios. ¹⁹ Al Paxi Linilngiya tuya'e' lo'ıya, ticua: Timana' lan xanuc' nocuapá: “Acueca' laipicuejma', iya' linca aixina”.

LanDios ticua: “Iya' camuc'i'mola' te ts'i'ic' liłpicuejma', aiqilısina”.

Jouc'a timana' nocuapá: “Iya' linca cacueca”.

LanDios ticua: “Iłniya aiqilcueca, camuc'i'mola' tołta'a”.

²⁰ Itsiya, ¿te qui'ipola' nocuapá: “Acueca' lałpicuejma'”? ¿Te qui'ipola' iłniya nipa'acopá liłjuac lan tsilaj cataiqui', iłne lomxiye cataiqui'? LanDios joupá imujpa iłne aiqilısina'. Ełtaiqui' tipa'acoyi malpe liłpicuejma' pangay camac'ta cataiqui'.

²¹ Jifa'a li'a lamats' lan xanuc' naihuejpá quilıuca' liłpicuejma' tama tocomma acueca' liłpicuejma' iłniya aiqilimetsaijma LanDios. Iłque linca acueca' lipicuejma', tołta'a ixpic'epa tunlu'etsola' lan xanuc' nepenufpá lataiqui' laluya'apa. He tocomma to lamac'ta cataiqui', tinescojma li'ipa jilpe lancruz.

²² Lan judıo ticuayi: “Ti'eła' al cueca' LanDios, alsinte illanc', tijoułta' al'huaiyjm'me”. Lan griego ticuayi: “Alsinte, alquimf'ete anuli ts'acueca' lipicuejma', acueca' quitaiqui' loya'apa, tijoułta' al'huaiyjm'me”. ²³ Illanc' ma' ałnescoyi Cristo, iłque lummepe LanDios. Luya'ayi: “Iłque lepałts'ingimpa lancruz”. Licuejpá tołta'a lan xanuc' judıo

ixtulencia. Ticuayi: “Ja'ni lepałts'ingimpa lancruz aicummaic' ŁanDios”. Petsi a'ij judío, iłne lan griego, tetets'iyi laluya'apa, ticuayi: “Amac'ta cataiqui' iłiya”. ²⁴ Petsi lojoc'ipola' ŁanDios, ja'ni ajudío, ja'ni agriego, iłne linca timetsaicoyi Cristo łummepa ŁanDios. Jilpe iximpá al cueca' lo'epa ŁanDios, iximpá acueca' lipicuejma'. ²⁵ Liximpá li'ipa Cristo jilpe lancruz, lan xanuc' ticuayi: “ŁanDios ailopa'a quipicuejma', ailopa'a co'eya”. A'ij linca ilta'a locuapa. Xonca acueca' lipicuejma' ŁanDios, xonca acueca' lo'epa.

²⁶ Unc'aipimaye, imanc' lojoc'ipolhuo' ŁanDios, tolimetsaicoyołtsi te ts'i'ic' mołmana'. Imanc' a'i cunc'itsila' xanuc'. Ma le'a oquexi' afantsi imanc' acueca' lołpicuejma'. Ma le'a oquexi' afantsi ti'hua lołmane, tołcuxeyi. Ma le'a oquexi' afantsi loł'aillí ts'il'hueca, acueca' quıl'huexi. ²⁷ ŁanDios ixpic'epa tulijtsola' iłniya nocuapá: “Iya' aixina', acueca' laipicuejma'”. Tołiya i'huijf'epolhuo' imanc' petsi a'ij cueca' cołpicuejma', epi'ipolhuo' lołpicuejma' ti'ila' acueca' cołsina'. Ma' anuli ixpic'epa tulijtsola' nocuapá: “Acueca' ti'hua laimane, acueca' laif'eya”. I'huijf'epolhuo' imanc' petsi aimi'hua cołmane, ailopa'a al cueca' loł'eyacu. ²⁸ Ixplic'epa tulijtsola' lan tsilaj xanuc', iłne limetsaiconnila' fa'a li'a łamats'. Imanc' joupa ti'onłcospolhuo' to ninaitsi xanuc', etets'impolhuo', tocomma aimołmana' fa'a li'a łamats', ŁanDios i'huijf'epolhuo', timetsaico'molhuo'. Iłne lan tsilaj xanuc' aimimetsaiconyacola' tołta'a. Tejac'e'mola'.

²⁹ Aimi'ıya małnesyacu: “ŁanDios ałsimpa nincuecaj xans, tołiya lapenufpa”. A'i. Nij naitsi

nonesya tołta'a. ³⁰ Imanc' cołtuca' aicołspic'e. Ma ŁanDios ixpic'epa tepenuftsolhuo' Jesucristo. Małque ŁanDios ipo'nopa Cristo ałmuc'itsonga' te ts'i'ic' al cueca' lipicuejma' ŁanDios. Ja'ni ał'huaiyjnyi Cristo ŁanDios lapenufinga' to ailopa'a całjunac'. Iłque Cristo ał'e'eponga' i'huexi ŁanDios. Joupa i'najtsepa lałjunac'. ³¹ Tołta'a tenant'hi loya'apa al Paxi Linilingiya, ticua: “Ja'ni topalaıła' al c'a li'ipo', ne', toya'ała' al cueca' li'epa lałPoujna”.

2

¹ Unc'aipimaye, li'ipa małmana' anuli iya' aicai'e'e'moxi. Aı' nomxi cataiqui'. Aicai'aic' to tocomma acueca' laipicuejma', le'a nu'i'molhuo' Lataiqui' loya'apa lo'epa ŁanDios. ² Joupa aixpic'epa te ts'i'ic' lo'iya lai'ejma'. Cacua: Ma capa'a liıya' Corinto ca'nujuais'ma ma le'a Jesucristo, iłque łepałts'ingimpa lancruz. Capalaico'ma iłque. ³ Laicuaitsi jıłpe lołpiıya' tocomma ałmajaiquemma. Laipicuejma' cacua: ¿Te cał'iya? Tiyu caxpaiqui' laicuerpo. ⁴ Imanc' ałsimpa a'ij cueca' laipicuejma', a'ij cueca' laitaiqui', laıfpalaıpa. Ołsimpá ma le'a al cueca' lo'epa cal Espıritu Santo. Iıe linca ołsimpá. ⁵ Tołta'a aıcał'huaiyinge iya'. Aicołnesqui: “Acueca' lipicuejma' Pablo”. Imanc' ma' oł'huaiyjımpá ŁanDios, tołcuayi: “Acueca' lo'epa iłque”.

⁶ Linca tipa'a lataiqui' xonca acueca', ipime. Iıe lataiqui' camuc'ıla' lapimaye ts'iłpicuejma', iıne ticuec'eyi, aımi'onłcospola' to la'uhuy.

Iıe laıfnuya'apa ituca' cataiqui', a'i to liłtaiqui' lopalaıpa iıne naihuejpa' quıltuca' liłpicuejma'. Iıe laıfnuya'apa jouc'a a'i to liłtaiqui' lan tsııaj

quincuxepá, ihniya petsi ŁanDios tijou'ne'mola'.
 7 Lataiqui' laifnu'iyalepa tuya'e' al cueca' lixpíc'epa ŁanDios, tocomma emiya cataiqui'.

Lipangopa li'a łamats' ŁanDios joupa ixina' lo'eya, joupa ixpic'epa lo'iya. A'e'e'monga' pangay c'a łalpicuejma', ti'ila' to lipicuejma' ŁanDios, ałłaitsufcotonga'. 8 Lincuxepá nomana' fa'a li'a łamats' aikuilsina', aikuilcueca tołta'a lixpíc'epa ŁanDios. Ja'ni cołá' iłsina' aimepałts'ijnyacu łalPoujna, iłque ma' anDios. 9 Ma' al linca loya'apa al Paxi Linilingiya, ticua:

Lan xanuc' aikuilehuelojm'ma lił'u',
 aikuilquimf'ejma liłs'mats'i'.

Jilpe liłpicuejma' aikuilsina' te ts'i'ic' li'hueca ŁanDios.

ŁanDios joupa ilanc'epa, tepi'i'mola' lixanuc', ilne no'epá capic'a ilenDios.

10 Illanc' linca ałsina'. ŁanDios joupa ałmuc'iponga'. Cal Espíritu Santo alu'iponga'. Iłque cal Espíritu ixina' lipicuejma' ŁanDios, ixina' jahuy xonca lipime, ixina' xonca lemiya.

11 Anuli cal xans, ¿te ja'ni ixina' te ts'i'ic' lipicuejma' lif'as xans? A'i. Ma le'a ixina' te ts'i'ic' mixpic'e quituca' lipicuejma'. Jouc'a ŁanDios, ma le'a li'Espíritu, iłque cal Espíritu Santo, ixina' te ts'i'ic' lipicuejma' ŁanDios.

12 Illanc' lapenufpá cal Espíritu Santo, łalapi'iponga' ŁanDios. A'i calapenufi łocuenaj espíritu, iłque nocuxepola' lan xanuc' naihuejpá liłpicuejma'. ŁanDios ipic'a ti'ila' całsina' te ts'i'ic' łalapi'iponga', tołiya łapi'iponga' cal Espíritu Santo. Iłque ałmuc'inga'.

13 Lalu'ipola' lapimaye, ite lałtaiqui', aimalipa'acoyi caltuca' lałpicuejma'. Małque cal Espíritu Santo ałmuc'inga' te ts'i'ic' lałpalaicoyacu. Ite lonessa cal Espíritu Santo ałmuc'ila' lapimaye, itne pe joupa nepenufpá itque cal Espíritu, tihuejcoyi. 14 Anuli cal xans ja'ni aiquepenufi cal Espíritu Santo aimicueca te ts'i'ic' malapi'inga' cal Espíritu. Jahuay itiya tixina to amac'ta cataiqui'. Aimi'iya mihuic'iya. Ma le'a cal Espíritu Santo ti'i'ma timuc'i'ma. 15 Ja'ni joupa mepenufpa cal Espíritu Santo jahuay itiya tocueca. Cal Espíritu timuc'ihuo'. Linca, lan xanuc' tixinghuo' ocuena lopicuejma', aimicuec'ehuo', aimixingufhuo'. 16 Aimi'iya mixingufyaco'. El Paxi Linilingiya ticua:
 ¿Te ja'ni tipa'a naitsi niximpa te ts'i'ic' lipicuejma' LanDios?
 ¿Te ja'ni ti'i'ma timuc'i'ma LanDios?
 A'i aimi'iya.
 Illanc' lałpicuejma' i'ipa anuli lipicuejma' Cristo.
 Tołta'a aimalcuec'enyaconga'.

3

1 Unc'aipimaye, lałmajmpá anuli jilpiya aicaimuc'ilhuo' lipime cataiqui'. Aiqui'ic'. Tocomma afule molihuejyi Cristo. Aimolihuejyi cal Espíritu Santo. Xonca tolihuejyi coltuca' lołpicuejma'. Aiximpolhuo' ti'onłcospolhuo' to la'uhuyay. 2 Tołiya iya laites'mipolhuo' ti'onłcospa to aleche a'i quixic'. Cacia: Laimuc'ipolhuo' a'i quipime cataiqui', pangay aiquipime.
 Itniya litiné aiqui'ic' colihuic'i lipime cataiqui', itsiya jouc'a aimi'iya. 3 Ma' itsiya

tolihuejcoyi cołtuca' lołpicuejma'. Toł'ejcoyołtsi laic'. Tołfuli'icoyołtsi. Tolanajyołtsi, anuli anuli ti'hua lipene. ¿Te ja'ni tołta'a tolihuejcoyi cal Espíritu Santo? Tołta'a lił'ejma' iłniya pe aikuilepenufi cal Espíritu Santo. ⁴ Hualca imanc' tołcuayi: “Illanc' lihuejyi Pablo”. Hualca tołcuayi: “Illanc' lihuejyi Apolos”. Mi'i tołta'a loł'ejma' linca tolihuejcoyi cołtuca' lołpicuejma'.

⁵ Iya' ninPablo, ¿naitsi iya'? Apolos, ¿naitsi iłque? Illanc' ma le'a ninc'ixanuc', ał'eyi lanic' lalapi'iponga' ŁanDios. Aluya'ayi litaiqui' ŁanDios. Imanc' ol'huaiyijmpá iłque. Anuli anuli tipa'a lałpenic' lalapi'iponga' ŁanDios. ⁶ Iya' aifapa, Apolos ic'ejpa, ŁanDios itoc'epa. ⁷ Illanc' ałfapá, ałc'ejpá, a'ij cueca' iłe lanic'. Al cueca' xonca lo'epa ŁanDios Notoc'epa. ⁸ Ja'ni ałfayi, ja'ni ałc'ejyi, ma' anuli ał'eyi lanic' lalapi'iponga' ŁanDios. Tijoułta' anuli anuli lulij'me lalapi'iyaconga' ŁanDios. Ituca' ituca' lalapi'iyaconga' ma to lałpenic' lał'epa.

⁹ Ał'eyi canic' anuli ŁanDios. Imanc' ti'onłcospolhuo' to quequeya ŁanDios. Ti'onłcospolhuo' to lajut'ł lolanc'epa ŁanDios. ¹⁰ ŁanDios lapi'ipa laipenic', cuya'atsi litaiqui' Jesucristo. Tołta'a jilpe lai'epa ti'onłcospa to lo'epa łomxi canic' ts'ixina' lo'eya tilanc'eła' al c'a cajut'ł. Tocomma to aipupa camats', aipo'nopa lopo'nof'inyacu łaitał. Itsiya ocuenaye tuyai'eyi łaitał. Camila' iłniya: “Tołpo'nołe cuenna te ts'i'ic' lonł'eyacu. ¹¹ Ne', toluyai'etsa łaitał. Aimołpo'nocona'me lopo'nof'inyacu łaitał. Iya' joupá aipo'nopa, iłque Jesucristo. Ailopa'a cocuena.”

12-13 Ticuaitsi al Cuecaj Quitine ti'huájta acua-
jmaica te jale lanic' li'epa iñe nolanc'epá laitał.
Jilpe litine tilic'eyo'ma cunga. Lunga tuyaico'ma
jahuay, hualca tipi'e'ma nulemma, hualca tipane-
huo. Tołta'a ti'huájta te lilanc'ecompa liłpitał, ja'ni
a'oro, aplata, apic' juaiconapa ipitali, o ja'ni a'ec,
ajaxa, apajac. 14 Cal xans ja'ni tipanehuo laitał
lipo'nof'ipa, iłque tulij'ma lalapi'iya LanDios. 15 Ja'ni
tipiła' nulemma ailopa'a capenufya. Tope tope
tipanehuo. Jahuay li'epa tejac'ma. Ma to afule
munłu'enyacola' lan xanuc' mipila' hilejut'li, tołiya
afule munłuya iłque.

16 Imanc' nolafot'lepołtsi jilpe, ¿ja'ni aicołsina'
ti'onłcospolhuo' to ejut'ł LanDios? Jilpe tipanga cal
Espíritu Santo. 17 Cal xans najac'eya lejut'ł LanDios,
małque LanDios tejac'e'ma iłque cal xans. Ie lajut'ł
apaxi, ma i'huexi LanDios. Imanc' nołmana' ejut'ł
LanDios, imanc' i'huexi iłque.

18 Imanc' aimołfel'mi'mołtsi. Aimoł'onłico'mołtsi
to lan xanuc' naihuejpa' quilituca' liłpicuejma'.
Aimołnes'me: “Joupa aixina'. Acueca'
laipicuejma'.” Ja'ni tonesqui tołta'a najmay
taimetsaico'moxi mamac'ta. Tołta'a tapenuf'ma
copicuejma'. 19 Iñe naihuejpa' quilituca' liłpicuejma'
tama tocomma acueca' quiliłsina', LanDios tixinnila'
amac'ta. Tołta'a loya'apa al Paxi Liniliñgiya, ticua:
Iñe petsi acueca' liłpicuejma' linca iłsina' lixcay.

Ma mi'eyi iñe lixpice'epa, LanDios tic'aił'mola'.

20 Jouc'a tuya'e':

LanDios ixina' te ts'i'ic' liłpicuejma' iñe nocuapá:
“Iya' aixina’”.

Tixinnila' ailopa'a al c'a lo'eyacu.

²¹ Itsiya imanc' aimoñnescona'me: “Itque cal xans tipa'a xonca acueca' lipicuejma', itque nañcuxepa, quihuej'ma”. Itniya loñpomxiye lepi'icopolhuo' ñanDios titoc'itsolhuo'. ²² Iya' camilhuo': Imanc' ja'ni ałpalajma iya' ninPablo, o tołpalaicoyi Apolos, o Cefas (itque aPedro), o tołpalaicoyi li'a lamats', o lapajnya, o lamaya, o lopa'a itsiya, o lo'iya locuaicoya quitine, tołnujuaitsa ñanDios epi'icopolhuo' jahuay itna'a titoc'itsolhuo', a'i micuxeyacolhuo'. ²³ Linca tipa'a Nocuxepolhuo', itque Cristo. Mañque Cristo tipa'a nicuxepa, itque ñanDios.

4

¹ Ma Cristo lummeponga' ałtoc'itsolhuo' imanc'. Ite lañpenic'. Camilhuo': Limetsaicotsonga'. ñanDios lapi'iponga' lañmane lu'itsola' lan xanuc' litaiqui', ite xonca lemiya, luhuañc'e'e'mola'.

² Ja'ni tepi'inñe cal xans lipenic' ticuicomma tenant'ñita' ite lanic' lapi'impa. ³ Itsiya, ¿te co'iya? ¿Te ja'ni imanc' ti'i'ma ałmi'ma te ts'i'ic' laif'epa ite laipenic', ja'ni ac'a o a'ij c'a? O ¿tipa'a anuli cal juez fa'a li'a lamats' ti'i'ma ałmi'ma tołta'a? A'i, aimi'iya. Ni iya' caituca' canescoyacoxi ac'a laif'epa. ⁴ Tama iya' caituca' caxina ac'a laif'epa laipenic', aicaixina'. Le'a ñanDios ixina' ita'a. Ma' itque lu'i'ma.

⁵ Aimoñnescona'mola' lołpimaye, ja'ni ac'a o a'ijc'a lo'epa. Toł'huaicoñe ticuaicoconno lañPoujna. Fa'a li'a lamats' ti'onñcospa to lipuqui'. Axpe' aiñqui'huáqui. Itque lañPoujna tepalc'o'i'ma jahuay. Aimi'iya memiconaya, jahuay tixinim'me. Jahuay lixpic'epa lan xanuc' jilpe ñilunxajma' tixinim'me.

Ja'ni ac'a ał'epá lałpenic' ma ŁanDios lu'i'monga'. Anuli anuli ałmi'monga'.

⁶ Unc'aipimaye, ja'ni iya' camilhuo': "Tołe tołe lał'ejma' iya' y Apolos", ma le'a aipic'a tołta'a camuc'itsolhuo' aimołcuxecona'mołtsi cołtuca', aimołmicono'mołtsi: "Nij naitsi nałcuxeyacongá' illanc'", aimołfuli'icona'mołtsi. Aimolahuecona'me te co'iya molulijcoyacołtsi.

⁷ Ima', ¿te aimi'onłcospo' lopimaye? ¿Te xonca ts'o'hueca? Ja'ni o'hueca, ¿naitsi lepi'ipo'? Ja'ni ŁanDios Nepi'ipo', ¿te cołof'ecopoxi? Tocomma co-tuca' ima' mepi'ipoxi.

⁸ Imanc' tocomma ixhuaita lołpicuejma'. Ailopa'a cahue'epolhuo'. Ti'i'ma tołcuxe'mołtsi cołtuca' imanc', latets'inga' illanc'. ¿Te tołcuayi: "Joupa lulijpá. Aimałtoc'icona'monga'?" Iya' cacua: ¡Coła' olulij'me! Tołta'a illanc' jouc'a lunxaj'me.

⁹ Illanc' ninc'apóstole tocomma ŁanDios ałpo'noponga' fa'a li'a łamats' to ninaitsi xanuc'. Fa'a latets'ininga' to latets'impola' lan xanuc' no'epá acueca' lixcay, iłne ma le'a il'huaijma titeł'mintsola', tima'am'mola'. Ma le'a lixocongá' illanc'. Lapaluc' nomana' lema'a jouc'a lan xanuc' nomana' fa'a li'a lamats' lahuelonginga' lał'iyaconga'.

¹⁰ Imanc' moł'huaiyjnyi Cristo tołsinyołtsi acueca', ac'a lołpicuejma'. Illanc' aimałnescoyacołtsi tołta'a. Mał'eyi lanic' lalapi'iponga' Cristo, lan xanuc' ałnescoponga', ticuayi: "Iłne amacta". Imanc' nipajnya toł'e'me al cueca', illanc' a'i. Nij tintsi mi'iya mał'eyacu. Imanc' timetsaicolhuo' lan xanuc', tixpaic'elhuo'. Illanc' a'i. Latets'ininga'.

¹¹ Illanc' ti'hua ałtelcoyi, lunle'eyi, lahue'enga' całsnayacu, lahue'enga' całpijahua', luntafquina',

ailopa'a calajut'í, ma le'a aʔelocoyi. ¹² Aʔ'ecoyi canic' laʔmane', acueca' quixoqui.

Ja'ni aʔmiloquina' cataiqui', aʔpaxnela'. Ja'ni li-huetsoquina', aʔsnet'ʔyi. ¹³ Ja'ni aʔnesconga' quix-cay, aʔtalai'e'mola' al c'a. Illanc' aʔ'onlicoponga' to cal cueca' ʔifuc, iʔpic'a ma liʔonc'etsonga' nulemma. Toʔta'a aʔ'e'enga'.

¹⁴ Laifpalaic'opolhuo' toʔta'a aicatalelhuo'. Cax-innilhuo' to cainaxque', ma le'a caxc'ai'ilhuo'. ¹⁵ Imanc' tama ti'íʔa' axpela' loʔpomxiye, tixhuaispola' to imbamaj mil, a'ijxpela' loʔailli'. Ma le'a iya' coʔailli'. Iya' ma' ca'ay lanic' lalapi'ipa Cristo, nu'ipolhuo' Lataiqui' loya'apa iʔe al c'a lixpíc'epa ʔanDios. Imanc' olapenufpa', i'ipolhuo' ainaxque'. ¹⁶ Iya' to oʔ'ailli' caxa'huelhuo', camilhuo': Lihuejla' iya' lai'ejma'.

¹⁷ Toʔta'a tu'itolhuo' Timoteo. Iʔque ai'hua, aipic'a. ʔinca tihuequi ʔaʔPoujna. Cumme'ma ti'huata' pu'huanni tixintsolhuo', ti'nujuaitsi'itsolhuo' te ts'i'ic' cainihuequi Cristo, te ts'i'ic' lataiqui' laifmuc'ipola' lapimaye ni petsi lafoʔyomma.

¹⁸ Jiʔpe hualca ti'e'eyoʔtsi, ticuayi: “Iʔque Pablo aimicuaiya fa'a. Illanc' aʔsina' laʔ'epa.” ¹⁹ Iya' ja'ni ipic'a ʔaiPoujna Jesucristo aimacʔoʔya, ca'hua'ma jiʔpiya. Cacuaitsi caxinnola' te ts'i'ic' lo'epa iʔniya no'e'epoʔtsi. Iʔne ʔinca acueca' locuapa. Caxinnola' ja'ni acueca' ac'a lo'epa. ²⁰ Petsi ʔanDios ticuxe a'i ma le'a mipaloʔaiyi, jouc'a ti'i'ma acueca' ac'a lo'epa.

²¹ Itsiya, ¿te ts'oʔpic'a? ¿Cacuaitsi quixtu'hua cataletolhuo'? O ¿cacuaitsi tixoqui neta, cahuejn-

tolhuo', capalaic'otolhuo' al c'a? Imanc' coŧtuca' toŧsim'me.

5

¹ Iya' aicuejpa lopalaicompolhuo' imanc'. Pe loŧmana' tipa'a anuli ixcay lo'epa. Lan xanuc' pe aimimetsaicoyi LanDios aimi'eyi to lo'epa iŧque. Joupá ilecopa lihuomi'máma'. ² Imanc' aimoŧsueŧmot'ŧeyi, ti'hua toŧnescoyoŧsi: “Illanc' xonca ac'a lihuejyi”. Coŧa' olipa'a'me iŧque ni'epa lixcay.

³ Iya' tama jifa'a capa'a, tocommá ma' anuli to jipu'hua aŧmana'. Iya' joupá aixpic'epa laŧ'e'eyacu iŧque cal xans ni'epa iŧe lixcay. ⁴ Tolafot'ŧetsoŧsi toŧ'etsa ma to laŧcuxe'eponga' laŧPoujna. Imanc' jilpiya loŧmana'. Iya' tama capa'a fa'a, laipicuejma' ti'hua'ma pu'huanni, toŧta'a ti'i'ma to lafot'ŧeyoŧsi anuli. Jilpe ti'hua'ma acueca' limane laŧPoujna Jesu-cristo. ⁵ Toŧiya laca'nico'me iŧque cal xans, aŧcu'me ticuaitsi limane Satanás, titeŧ'miŧa'. Titeŧcoŧa' licuerpo aimixahue'econa'ma lixcay. Tunŧuŧa' li'alma litine ticuaiyunni laŧPoujna Jesús.

⁶ Imanc' ti'hua tixoqui cunlata, tocommá coŧa' ailopa'a tintsí. A'ijc'a iŧe loŧ'ejma'. ¿Ja'ni aicoŧsina' lo'eya tuŧcanni cal levadura lohuants'impá ŧax'e? Tama tuŧcanni titoj'ma jahuay ŧax'e. ⁷ Iŧe lixcay lonŧ'ejma' ti'onŧcospa to cal levadura, tonlaca'niŧe. Ti'itsolhuo' to cal ts'e harina ŧax'e pe ailopa'a qui'ic'. La'i loŧanc'ecompa cal ts'e harina ŧax'e titejn-ni al juic Pascua. Jilpe al juic ti'nujuaitsinni li'epa LanDios litine lunŧu'epola' lixanuc', iŧniya li-joupá ima'apá ŧaca'huaj moŧ. Illanc' aŧ'nujuaisyi liMoŧ LanDios, joupá ŧima'ampa, iŧque Cristo. ⁸ Aŧ'nujuaitsa

itque, tołta'a ał'e'me juic. Jiłpe al juic aimixinim'me itque cal levadura. Laifnescopa “cal levadura”, canescojma lixcay. Cacula: Aimal'e'me lixcay. Aimalnescocona'mola' quixcay lałpimaye. A'i ma le'a mał'e'e'mołtsi to lan c'a xanuc', al linca ał'itsonga' ac'a lałpicuejma'.

⁹ Laininił'epolhuo' aimipolhuo': “Tolanajtsołtsi itne no'epá al xujc'a. Aimolłejmale'me itne pe noxhuicopá ocuenaye cacał'no' a'i quilpenoye.”

¹⁰ Laimipolhuo' tołta'a aicapalaicocola' lan xanuc' pe aimimetsaicoyi ŁanDios. Linca itniya tixhuicoyi lacał'no', tijanajyi lił'huexi lił'as xanuc', tifel'miyaleyi, texic'eyaleyi lił'as xanuc', text'onłingolaiyi landiosla'. A'i camiyacolhuo' tolanajtsołtsi itniya. Ja'ni tołta'a lonł'eyacu tolipalcu nulemma jifa'a li'a łamats'. ¹¹ Iya' canescola' lił'ejma' lapimaye. Camilhuo' lonł'eyacu ja'ni anuli łolpima tixhuijma ocuena cacał'no' a'i quipeno, ja'ni tijanaca ocuenaj 'huexi, ja'ni text'onłingai'ila' landiosla', ja'ni tinesc'ela' cataiqui' lapimaye, ja'ni isna, ja'ni tifel'mila' lipimaye mexic'e'ela' liłtomí. Camilhuo': Ja'ni tołta'a li'ejma' anuli łolpima tolanajtsołtsi, ni aimolłetso'me anuli itque.

¹²⁻¹³ Itniya pe a'i całpimaye, ¿ja'ni iya' itjuez? ¿Ja'ni cateł'mi'mola' itniya? A'i. Ma ŁanDios itjuez itne. Lołpimaye nomana' jiłpiya, imanc' ti'hua lołmane ti'i'ma tołteł'mi'mola'. Itque ni'epa lixcay, tolipa'ale.

6

¹⁻² Imanc', ja'ni ticuicomma tixanutsi lataiqui', ¿te colpalaic'ocopola' ts'itpenic', itne pe aimimetsaicoyi ŁanDios? ¿Te ja'ni aimolłsinyi calaic'ata? Aimol'econa'me tołta'a. Imanc'

i'huexi ËanDios. Małpiya pe lomana' lołpimaye tołxanu'etsoltsi lołtaiqui'. Imanc' illanc' i'huexi ËanDios. ¿Ja'ni aicołsina' te ts'i'ic' laluyalaicoyacu? ËanDios lapi'i'monga' lałmane, ał'i'monga' iłjuez lan xanuc', ilne pe aimimetsaicoyi ËanDios. Locuaicoya quitine, ja'ni tołta'a acueca' ti'i'ma loł'eyacu, itsiya litine, ¿te aimi'iya monł'eyacu ilē a'ij cueca'? ³ ¿Te aicołsina' lo'iya Locuena Quitine? ËanDios ałpo'no'monga' iłjuez lapaluc' quema'a. Itsiya litine, ¿te aimi'iya mołsanuyacu ilē lo'ipolhuo' jifa'a li'a lamats'?

⁴ Ma muluyalaicoyi lapajnya ja'ni tipa'a lo'ipa jilpiya pe lolafot'leyopoltsi, najmay tołnanc'otsola' ma lołpimaye, ilne tixanułe lataiqui', tama tocomma nij naitsi xanuc' ilniya. ⁵ Camilhuo' tołta'a aipic'a tołsintsołtsi te ts'i'ic' loł'ejma', tołsinke calaic'ata. Jilpe, ¿ja'ni ailopa'a ni' anuli łapima ts'ixina'? ¿Ja'ni ailopa'a ni' anuli ti'i'ma ti'e'ma tixanu'e'mola' liłtaiqui' lipimaye? ⁶ Tocomma to ailopa'a. Tołiya lapimaye ticuxecoyołtsi, tiyeyi pe lomana' lan juez, ilne pe aimimetsaicoyi ËanDios.

⁷ Linca ma mołfuli'iyoltsi, mołcuxecoyołtsi timenaquilhuo' juaiconapa. Xonca ac'a lonł'eyacu ja'ni tołsnet'i'me lo'ipolhuo'. Ja'ni a'ijc'a lo'epolhuo', ja'ni ifel'mipolhuo', aimolixtuc'o'moltsi. ⁸ Imanc' ituca' loł'ejma'. A'ijc'a lonł'epola' lołpimaye, ołfel'mipola'. Tama ołpimaye tołta'a lonł'epa.

⁹ ¿Te aicołsina' lo'iyacola' ilne no'epá al xujc'a? Aimitsuflaiyacu pe locuxeyopa ËanDios. Imanc' aimołfel'mi'moltsi. Aimołcua'me: “Tama tołiya laif'epa catsufaita”. Ilne nahuepá cacal'no',

jouc'a naxc'onlingoŕaipá landiosla', jouc'a noxhuicopá ocuenaye cacal'no', a'i quitpenoye, jouc'a lan xanuc' no'e'epoŕtsi to lacal'no', jouc'a nonangoŕaipoŕtsi liŕf'as xanuc', ma to li'epa lan xanuc' jilpe liŕya' Sodoma, ¹⁰ jouc'a nonantsepá, jouc'a nojanajpá łocuenaj 'huexi, jouc'a noxnatsaipá, jouc'a nopalaicopá quixcay, jouc'a nofel'miyalepá mulijyi acueca' quitomí, jahuay ihniya ŁanDios aimepi'iyacola' lane, aimitsuflaiyacu pe locuxeyopa.

¹¹ Linca, li'ipa toŕta'a lonŕ'epa hualca imanc'. Itsiya a'i. Joupa oŕnespá: “Ca'huaiyinge Jesús, iŕque aiPoujna”, joupa epo'impolhuo', i'e'epolhuo' limpio, olapenufpá cal Espíritu Santo. Toŕta'a i'ipolhuo' i'huexi ŁanDios. Iŕque tepenufilhuo' to ailopa'a coŕjunac'.

¹² ¿Te ja'ni anuli ticua: “Tipa'a lane. Jahuay ti'i'ma ca'e'ma.”? Linca jahuay ti'i'ma aŕ'e'me. A'i jahuay metenłcocoya. Cagua: Ja'ni ti'i'ma lulij'ma, iŕe aica'eya. ¹³ Tinesyi: “ŁanDios ilanc'epa lałcu'u ti'nijmaispa lałtejacu. Jouc'a ilanc'epa lałtejacu ti'nijmaitsi lałcu'u.” Linca ma małmana' fa'a li'a łamats' ti'hua ti'nijmaita lałcu'u lałtejacu. Ticuaitsi Locuena Quitine ihya lałcu'u ailopa'a, jouc'a lałtejacu ailopa'a. Toŕta'a lixpíc'epa ŁanDios. ¿Te ŁanDios lapi'iponga' lałcuero lahuecotsola' lacal'no'? A'i. Lapi'iponga' aŕ'eŕe lanic', iŕe lalapi'iponga' lałPoujna. Iŕque iPoujna lałcuero jouc'a. ¹⁴ ŁanDios joupa imaf'i'ina pa lałPoujna Jesucristo. Toŕta'a ałsim'me al cueca' lo'eya ŁanDios. Ałmaf'i'ina'monga' jouc'a lałcuero.

¹⁵ Lałcuero joupa i'ipa i'huexi Cristo, tocomma

to limane', li'mitsi' itque. ¿Te aicołsina' ita'a? ¿Te liłonc'e'e'me hi'huexi łalPoujna Jesucristo? ¿Te lapi'i'me anuli łaca'no' notepa licuerpo? Itque tix-huico'ma ma to mijanaca. A'i, aimi'iya. ¹⁶ Lan xanuc' lacał'no' ja'ni jousa ejonłipołtsi i'epołtsi anuli. Jouc'a ma' anuli cal xans tejonłixoxi łaca'no' notepa licuerpo, ti'i'mola' anuli itniya. ŁanDios ticua: “Loquexi' tejonłi'mołtsi, ti'i'ma anuli liłcuerpo”. ¿Te aicołsina' ita'a? ¹⁷ Jouc'a cal xans itejmale łalPoujna Jesucristo, itque y łalPoujna i'ipołtsi anuli, anuli liłpicuejma' itniya.

¹⁸ Tołpo'nołe lołpicuejma', aimoł'noł'mola' lacał'no'. Tolinuc'etsola' itniya. Ticuanni: “Ja'ni a'ijc'a lał'epá ailopa'a co'iya lałcuerpo, tołe ałmanecu”. Iya' camilhuo': A'i. Naitsi no'nołpa ocuena caca'no' tixis'mecoyoxi, titeł'miyoxi quituca', tecani'e licuerpo. ¹⁹ ¿Te aicołsina' lołcuerpo ti'onłcospa lajut'ł pe lopa'a ŁanDios? Jiłpe tipa'a cal Espíritu Santo, itque łumme'epolhuo' ŁanDios. Itsiya aimi'iya mołcuxeyacołtsi cołtuca'. ²⁰ Acueca' li'najtsecopa ŁanDios, tołta'a i'epolhuo' i'huexi. Jiłpiya lołcuerpo tołs'najtsi'ite ŁanDios. Tonł'ele ma le'a latentłcocoya.

7

¹⁻² Itsiya quinił'elhuo', catalai'e'elhuo' lalicuis'epa jiłpe lołje'e. Licuis'epa, ałmi ja'ni ac'a lołpic'epa anuli cal xans nonespa: “Iya' capajm'ma caituca'. Aicahueya caipeno.” Ne'. Tama ac'a lołpic'epa itque cal xans, najmay lan xanuc' anuli anuli temallite. Jouc'a lacał'no' anuli anuli temallite. Tołta'a aimi'eyacu nixpiya.

3 Cal xans aimicuanaj'moxi, ti'e'exoxi anuli lipeno. Jouc'a łaca'no' aimicuanaj'moxi, ti'e'exoxi anuli łipe'ailli'. 4 Aimines'ma łaca'no': "Laicuerpo ai'huexi. Ja'ni aipic'a ca'e'e'moxi cuenna." Ai. Licuerpo łaca'no' i'huexi łipe'ailli'. Jouc'a cal xans aimines'ma: "Laicuerpo ai'huexi. Ja'ni aipic'a ca'e'e'moxi cuenna." Ai. Licuerpo cal xans i'huexi lipeno. 5 Imanc', aimołcuanac'e'mołtsi. Ma le'a tołcuanac'e'mołtsi ja'ni tołspic'ełe loquexi' imanc'. Ja'ni tołnesle: "Alanajle oquej afane' quitine, ałsnet'He, ałpalaic'o'me ŁanDios. Muyaipá iłne łitiné ał'e'e'mołtsi cuenna." Ja'ni tołta'a ołspic'epá, ne', toł'e'etsołtsi cuenna. Tuyaił'a iłne oquej afane' quitine tonł'e'econatsołtsi anuli. Ja'ni a'i aimołsnet'lyacu. Tijouł'a łonta'a Satanás tehuai'molhuo'.

6 He laitaiqui' laifmipolhuo': "Anuli anuli cal xans temaneł'a", aicacuxe'elhuo' tołta'a. Ma le'a camilhuo': Tipa'a lane ti'ila' tołta'a lonł'eyacu. 7 Iya' xonca aipic'a timajnle quilituca' lan xanuc', ał'onłcota to iya'. Iya' capa'a caituca'. Tama tołta'a laifcuapa hualca aimi'iya mi'eyacu. Ituca' ituca' lapi'iponga' lał'ejma' ŁanDios. Anuli ti'i'ma tixnet'ł'ma, łocuena aimi'iya mixnet'lyacu.

8 Imanc' pe aiconlamalliyi, jouc'a ja'ni apot-sateya cacal'no', iya' camilhuo': Tołmajnle cołtuca', ma to iya' capa'a caituca'. Tołta'a xonca al c'a tuluyalaico'me. 9 Ja'ni tołjanajyołtsi juaiconapa, tocomma tołpi'eyołtsi, najmay tonlamallile.

10 Imanc' unc'apimaye joupa nolamallipá camilhuo' lonł'eyacu. Iya' a'i caituca' iłta'a laifcuxe'epolhuo'. Camilhuo' ma lałcuxe'eponga' lałPoujna.

Imanc' unc'acal'no' camilhuo': Aimainuc'e'ma łope'ailli'. ¹¹ Ja'ni ominuc'epa aimahueta ocuenaj xans. Topajnla' cotuca'. O ja'ni aimi'iya, taihuejnała' łope'ailli', tołxanunatsoltsi lataiqui', tolimenc'e'ecotsoltsi loł'epa.

Jouc'a cunc'aipimaye xanuc' camilhuo': Aimaihuescuf'ma łopeno.

¹² Locuenaye imanc' nolamallipá petsi le'a anuli imanc' naihuejcopa Jesucristo, camilhuo' lonł'eyacu. İta'a laifmipolhuo' aicalmic' lałPoujna. İłque aiquipo'nohuo cataiqui' lonł'eyacu. Ma' iya' caituca' caxc'ai'ilhuo', camilhuo': Unc'apimaye, ja'ni anuli imanc' łipeno, tama aimihuejma Jesucristo, tixpic'e tipajnla', ne', timajnle anuli, aimihuescuf'ma. ¹³ Jouc'a unc'apimaye cacal'no', ja'ni anuli imanc' łipe'ailli', tama aimihuejma Jesucristo, tixpic'e tipajnla', ne', timajnle anuli, aiminuc'e'ma. ¹⁴ İma' taihuequi Jesucristo, tama łope'ailli' aimihuequi, ŁanDios joupa imetsaicopa ilque to cope'ailli'. Ma' anuli maipima, ima' taihuequi Jesucristo, tama łopeno aimihuequi, ŁanDios joupa imetsaicopa ilque to copeno. Ja'ni a'i tołta'a ŁanDios coła' aiqumetsaicola' lołnaxque' ilne i'huexi. İtsiya linca timetsaicola' ilniya. ¹⁵ İhne pe aimihuejyi loquexi' Jesucristo, axans o aca'no', petsi aiqihuequi ja'ni ipic'a tenaj'moxi, ima' petsi mihuequi tapi'ila' lane. Aimones'ma: "Joupa alfi'inga'. Aimi'iya malux'masyacoltsi." ŁanDios alıjoc'iponga' almajnle al c'a, aimalfulołque'me. ¹⁶ İma' maipima caca'no', ja'ni łope'ailli' aimihuequi Jesucristo, mipa'a ilque ima' aicoxina' ja'ni ti'i'ma to'e'e'ma tixhuej'menanni, tuntu'ma. Jouc'a ima' maipima, ja'ni łopeno aimihuequi,

mipa'a itque ima' aicoxina' ja'ni ti'i'ma to'e'e'ma tixhuej'menanni, tunlu'ma.

¹⁷ Iya' cacua: Ma to la'ejma' lalapi'iponga' la'Poujna, to'ta'a a'e'ete. Jouc'a ma to qui'ic' la'po'noponga' LanDios to'ta'a luyalaico'me lapajnya. To'ta'a laifmuc'ipola' lapimaye ni petsi lafo'yomma. ¹⁸ Ite litine lijoc'ipo' LanDios ja'ni joupa etec'empo' lopixic', i'ipa loseña, tipanenni to'ta'a. Aimon'es'ma: “¿Te caif'eya? Qui'lonc'e'e'moxi ite laiseña.” O ja'ni aiquetec'enghuo' lopixic', topanenni to'ta'a. Amon'es'ma: “Alatec'e'enta' laipixic’”. ¹⁹ Ailopa'a tintsi. Ja'ni etec'empo' lopixic' o a'i, ma' anuli ite. Taihuejla' locuxepa LanDios. To'ta'a linca tetent'cocojma LanDios.

²⁰ Jahuay imanc', ma to mipa'a lo'pepajnya litine LanDios lijoc'ipolhuo', ma to'ta'a to'majnle. ²¹ Ima' jousa ijoc'ipo' LanDios, ja'ni ummozo, i'huexi lo'poujna, aimoxhue'lmot'le'ma. Ja'ni tixpic'enle tux'masnatso' ima' tones'ma: “A'i. Najmay capanehuo. Fa'a quihuejco'ma Cristo.” ²² Litine lijoc'ipolhuo' LanDios, ite litine Cristo itonc'epolhuo' limane lonta'a. Itsiya, ja'ni ima' ummozo, ima' i'huexi lo'poujna fa'a li'a lamats', o ja'ni ailopa'a copoujna fa'a, ma' itque Cristo o'Poujna loquexi' imanc'.

²³ To'nujuaitsa, LanDios i'najtsepa acueca' ti'etsolhuo' i'huexi Cristo. Aimolihuej'mola' lan xanuc', tunlihuejle Jesucristo. Itque linca o'Poujna.

²⁴ Unc'aipimaye, ma to mipa'a lo'pepajnya ite litine LanDios lijoc'ipolhuo', ma to'ta'a to'majnle. To qui'ic' ton'ete latent'cocoya LanDios.

²⁵ Lapimaye cahuats'la jouc'a lamijcanó, la'Poujna Jesucristo aicalu'ic' lo'eyacu itniya. Iya'

cu'i'molhuo' laifxpíc'epa iya' caituca' laipicuejma'.
 Linca ÑanDios jounpa ahsanu'epa laipicuejma',
 aicafel'miyale. ²⁶ Camilhuo': Itsiya ipime
 lapajnya, afule maluyalaicoyi. Ine lahuats'la o
 lamijcanó xonca al c'a tuyalaico'me ja'ni timajne
 to mimana'.

²⁷ Ima' maipima, ¿te fi'ilhuo' ñopeno? Aimox-
 huehmot'le'ma. Aimahue'ma tolux'mas'mołtsi. O
 ima', ¿te ailopa'a copeno? Ne', aimahue'ma
 copeno. Topajnla' tole. ²⁸ O ja'ni tamane'ma,
 nipajnya, tamanela', ailopa'a tintsí. Jouc'a anuli
 lahuats', ja'ni temane'ma ailopa'a tintsí. Ma' ałnca
 ine namallipá xonca ipime liłpepajnya. Iya' aipic'a
 aimołte'li'mi'mołtsi. Tołiya cu'ilhuo': Xonca al c'a
 tuluyalaico'me ine pe aimemalliyi.

²⁹ Itsiya ÑanDios ipic'a ti'ila' ituca' laluyalaicopa
 lapajnya. Etec'opa litiné, aimicołya li'a lamats'.
 Tołiya ine nemallipá ti'onłcotola' li'ejma'
 to ine pe aikuilemali. Tixojma quileta
 ti'e'me lanic' lapi'ipola' ÑanDios. ³⁰ Jouc'a
 nohuotsopá, ticuicomma ti'e'ma ma to ailopa'a
 quılıpihuotsoqueya. Jouc'a noyalaicopá al c'a,
 aimi'e'me ma le'a liłpinoxjma cata ine quılıtuca',
 ti'nujuaisle liłpimaye. Jouc'a no'najualepá, tama
 tipa'a lił'hueca aimi'nujuais'me iłiya. ³¹ Jouc'a
 nolijpá quılıtomí fa'a li'a lamats', aimixhuej'me'me
 ma le'a iłe lanic'. Li'a lamats', jahuay lałsimpa fa'a
 itsiya, ti'hua tijaf'que, tijouna'ma.

³² Aipic'a aimołsuełcocoyacu lapajnya fa'a
 li'a lamats'. Ñapima nopa'a quituca' itine itine
 ti'nujuaitsi Jesucristo. Tehuay tetenłcoco'ma iłque
 liPoujna. ³³ Ñapima nemanepa itine itine ti'nujuaitsi

lapajnya fa'a li'a lamats'. Tehuay tetencoco'ma lipeno. ³⁴I'ipa oque' lipicuejma'.

Ma' anuli lo'ipa lapima cahuats'. Itine itine ti'nujuaitsi Jesucristo. Ticua: "Aipic'a al'ila' i'huexi Cristo, lai'alma jouc'a laicuerpo. Le'a itque aiPoujna." Lapima caca'no' nemanepa ti'nujuaitsi lapajnya fa'a li'a lamats'. Tehuay tetencoco'ma hipe'ailli'.

³⁵Laixc'ai'ipolhuo' to'ta'a aipic'a catoc'itsolhuo'. Aicacuxenai'ilhuo'. Aicamilhuo': "To'e, to'e ton'ete". Ai. Ma le'a cacua: "Tetencocota' lo'ejma' LanDios". To'ta'a itine itine jahuay lolunxajma' to'joc'i'me la'Poujna. Ja'ni acueca' to'sue'cocoyi xonca to'nujuais'me lapajnya fa'a li'a lamats', aimi'iya mo'joc'iyacu LanDios.

³⁶Cal xans y anuli lahuats', petsi aiquejonhiyo'tsi ma le'a tiyejmaleyi mi'eyi lanic' lapi'ipola' la'Poujna Cristo, ja'ni ticuaiti litine aimixnet'iqui cal xans, ipic'a ti'e'e'mo'tsi anuli, ne', temalli'e. Ti'e'ma ma to ts'ipic'a. LanDios tixina ac'a lo'eya.

³⁷Jouc'a ac'a lo'epa cal xans jounpa ixpic'epa, ticua: "Ma' alejmale'me, aimalajonhiyacot'si iya' lahuats'". Ne', to'ta'a tiyejmale'me, ailopa'a tintsi, aimemalli'me. ³⁸Iya' cacua: Ac'a lo'eya cal xans nolecoya lahuats', lamalliyacu. Xonca ac'a lo'eya itque petsi aiquilejma, aimemalliyacu.

³⁹Ma' imaf'i' hipe'ailli' laca'no' ifiyiya. Ja'ni timanta' hipe'ailli' laca'no' ux'masquenamma. Tipa'a lane temanecona'ma. Ma le'a ti'ila' cal xans jouc'a i'huexi la'Poujna Jesucristo. ⁴⁰Tama ti'i'ma temalli'me, laca'no' ja'ni tipajna' quituca' xonca ac'a tuyaico'ma lapajnya. To'ta'a laifmipolhuo' iya'. Cacua: Jouc'a iya' cal Espiritu Santo alcuxe laifmipolhuo'.

8

¹ Itsiya ałpalaico'me lotsufcopa landiosla'. Linca jahuay illanc' ŁanDios lapi'iponga' lałpicuejma'. Ałsina' lał'eyacu. Iya' cacua: Tama tipa'a lałpicuejma' ja'ni aimal'nujuaitsila' lałpimaye, ¿te quipenic' lałpicuejma'? Tołta'a ma le'a lunfu'eyołtsi lałpicuejma'. Ja'ni jouc'a ał'nujuaitsila' lałpimaye, ja'ni ałtoc'ila' xonca ałfa'e'moltsi lałpicuejma'.

² Cal xans nocuapa: “Ne', ne', aixina’”, itque aikuixina', ma le'a ticua. ³ Cal xans no'epa capic'a ŁanDios, ŁanDios timetsaijma itque cal xans.

⁴ Ałpalaico'me łotejnyacu joupa łitsufcopa lilen-diosla', ja'ni ti'i'ma ałte'me o aimi'iya. Iya' cacua: Illanc' joupa ałsina' tipa'a anuli ŁanDios. Landiosla' ailopa'a co'eyacu. ⁵ Linca timana' iłniya lacui'impola' “andiosla’” o “apoujnalá”. Ja'ni fa'a li'a łamats' o jilpe lema'a tama ti'ila' axpela' iłne landiosla', ⁶ illanc' tipa'a ma' anuli łalanDios, itque ał'Ailli'. Jahuay lopa'a itque ixpic'epa ti'ila', małmana' fa'a li'a łamats' ał'ełe latentłcocoya itque. Jouc'a tipa'a le'a anuli łalPoujna, itque Jesucristo. ŁanDios jahuay lixp'epa ti'ila', itque łalPoujna ilanc'epa, lapi'inga' al ts'e lałpitine.

⁷ Timana' lapimaye aimicuec'eyi. Ticuayi: “Iłniya lan imagen ma' andiosla'. Cal teju'a' łitsufcompola' joupa i'ipa ił'huexi iłniya.” Pe none-spá tołta'a ja'ni titełe łitsufcompola' tixhuełco'me, tines'me: “Aijc'a lał'epa”. ⁸ ¿Te aga łaltepa lapen-ufco'monga' ŁanDios? Ja'ni ałtełe łitsufcompola' landiosla', ¿te aga ŁanDios ałsim'monga' xonca acueca' lałpicuejma'? A'i. Ja'ni aimalteji, ¿te aga ałsim'monga' xonca a'ijc'a lałpicuejma'? A'i.

9 Tama aixina' tołcuc'eyi iłta'a, itsiya camilhuo': Tołspic'ele al c'a lonl'eyacu. Aimoluc'uilitsuf'e'mola' lapimaye petsi aiqilcueca. 10 Ima' tocueca, oxina' nipajnya tote'ma hitsufcompola' landiosla'. To'hua'ma al juic lo'epa jilpe lixoute' ilque hilendios, tote'ma hitsufcompa. Jilpe muyaipa łopima, ilque aimicueca, aimicua miteja, ticua: "Aimi'iya". Tixintso' ima' toteja, tipai'i'moxi lipicuejma', ticua'ma: "Ailopa'a tintsi. Iya' jouc'a cate'ma hitsufcompa hilendios." Ima' ¿ja'ni totoc'i łopima? A'i. 11 Ima' tocueca, ti'i'ma tote'ma. Łopima aimicueca tołta'a. Ja'ni titela' tixhuełco'ma, tecani'e'moxi. Małque łopima i'huexi Cristo, ilque Cristo itelcopa lamaya tunhu'ela'.

12 Tołta'a lonl'epa tolatets'ila' lołpimaye, tołscai'ela' liłpicuejma'. Tołatets'ila' a'i ma le'a lołpimaye, jouc'a tolatets'iyi Cristo. 13 Iya' cacua: Ja'ni łaitfepa tuc'uilitsuf'e'ma łaipima, aicateconaya iłiya.

9

1-3 Jilpe timana' nocuapá: "Ilque Pablo, ¿naitsi ilque?" Iya' catalai'e: ¿Te anuli cal xans aipoujna? ¿Te iya' a'i nin'apóstol? ¿Te aicalummaic' Jesucristo? ¿Te aicaixina' iya' ilque łalPoujna? Imanc' noł'huaiyijmpá Jesucristo, ¿naitsi nu'ipolhuo' Lataiqui'? ¿Naitsi cummepa Jesucristo ti'etsi lanic' jilpiya? ¿Te a'i iya'? Tama tinesyi ocuenaye: "Pablo a'i apóstol, aimi'hua limane", imanc' aimi'iya mołnesyacu tołiya. Imanc' olapenufpá łaitaiqui', oł'huaiyijmpá Jesucristo, tołta'a ŁanDios imuj'ma iya' ałınca nin'apóstol.

⁴ Illanc', ¿te aicalapi'inga' lane malapenufyacu laŧtejacu, laŧsnayacu lalapi'iyaconga' lapimaye? ⁵ ¿Te aimi'iya maŧeyacu anuli to lo'epa locuenaye lan apóstole, jouc'a lipimaye laŧPoujna, jouc'a Pedro? Iŧne iŧejma liŧpenoye apimaye. ⁶ Iŧniya linca tipa'a lane aimi'e'me canic', ma le'a ti'e'me iŧe lanic' lepi'ipola' caŧ'Ailli' Jesucristo. Iya' y Bernabé, ¿te illanc' le'a ailopa'a lane maŧeyacu toŧta'a?

⁷ Cal soldado, ¿te ti'najtse'ma quituca' loteja? Linfapa 'uva, ¿te aimiteja li'uva? O no'epola' cuenna lihuacax, ¿te aimixnaya liŧteche? ⁸ Iŧiya lainespa, ¿te ma' iya' caituca' quipa'e laipicuejma'? Lataiqui' locuxepa LanDios, ¿te aimuya'e' toŧiya? ⁹⁻¹⁰ Toŧta'a loya'apa licuxepa Moisés, ticua: "Mi'huailletsufyi lan huacax cal trigo, aimoŧfi'e'mola' lilepu'naŧ". Iŧe lataiqui', ¿te LanDios ma ti'nujuaitsila' lan huacax? o ¿aŧ'nujuaitsinga' illanc' naŧ'epá lanic', iŧe lalapi'iponga'? Linca, aŧ'nujuaitsinga' illanc'. Aŧ'onŧcosponga' to cal xans mepa'ma ŧemats' petŧi lofaya cal trigo, o to cal xans mifusma trigo. Iŧne tixoc'iyotŧi quileta ti'eyi canic', iŧsina' tite'me quiltrigo. ¹¹ Illanc' jilpiya aŧfapá Lataiqui', toŧiya ac'a loluyalaicoyacu imanc' Locuena Quitine. It-siya litine, illanc' maŧmana' fa'a li'a ŧamats', ¿te ailopa'a calafot'leyacu? ¿Ja'ni aimalapi'iyaconga' ni caŧtejacu? ¿Te toŧsinyi ipime iŧiya?

¹² Iya' cacua: Ja'ni tolimetsaicola' locuenaye ti'hua toŧta'a liŧmane, toŧtes'mila', ¿te aimalimet-saicoyaconga' xonca illanc'? Linca maŧmana' jilpe illanc' luyalaicoyi lapajnya to aimi'hua laŧmane. Ailopa'a caŧsahue'epoŧhuo' imanc'. Xonca aipic'a tolihuejle Lataiqui'. Aimolixtule'me.

13 ¿Te aicotsina' te ts'i'ic' loyalaicopá liḥpepajnya iḥniya no'epá canic' al xoute'? Iḥne titeji notsufcopá jiḥpe al xoute'. Iḥne petsi lotsufcompola' linneja jiḥpe al altar, maḥniya titeji iḥe lixic'. 14 LaḥPoujna illanc' ixpic'epa ma' anuli tuyalaico'me iḥne noya'apá Lataiqui'. Ixplic'epa aimi'e'me ocuena canic'. Muya'ayi Lataiqui' iḥniya, liḥpimaye tepi'intsole' lotejacu.

15 Iya' linca aicainuyaijma toḥta'a. Ni itsiya aicamilhuo': "Imanc' aḥtoc'ila'". A'i. Iya' tixoqui neta culij'ma laiftepa. Ja'ni cola' ti'ila' ituca' lai'ejma' caxhueḥco'ma juaiconapa. ¡Najmay aḥmaḥa! Iya' caituca' caxpic'e toḥta'a lai'ejma'. 16 Linca a'i caituca' laipicuejma' caxpic'e cuya'a'ma Lataiqui'. Iḥe lanic' jounpa lapi'ipa LanDios. Ja'ni aica'ay caxhueḥco'ma juaiconapa. Toḥta'a a'ijc'a laifnuyaicoya. 17 Ja'ni cola' iya' caituca' aixpic'epa cuya'ala' Lataiqui', aga aḥ'najtse'ma. Iya' caituca' aicaxpic'e, ma le'a quihuejcojma iḥe laḥcuxe'empa. ¿Te caḥ'najtsecoya? 18 Iya' linca aica'najtsi'iyale, ma le'a cuya'e' Lataiqui'. Tama ti'hua laimane, tama niḥpajnya caxahue'ela', aicaxa'hue. Tijouḥa', ¿te tipa'a laifnulijya? 19 Culij'mola' lan xanuc'.

Ailopa'a caipoujna axans. Tama ailopa'a naḥcuxeya aicaiḥof'eyoxi. Aixpic'epa ca'nujuaitsola' jahuay. Toḥta'a ti'i'ma xonca axpela' laifnulijyacola', iḥne napenufyacu Lataiqui'. 20 Iya' ninjudío ai'onḥicopoxi to laif'as judío, tetenḥcocotsola' iḥniya lai'ejma'. Aḥquimf'ela', tepenufle Lataiqui'. Itsiya tama aixina' aimalunḥ'eya litaiqui' Moisés, iya' ai'onḥicopoxi

to ñniya naihuejpá ñe lataiqui'. Cagua: Toñiya lapenuf'ma iya' laifnuya'apa Lataiqui'.

²¹ Jouc'a aipic'a tepenufle laifnuya'apa petsi aimimetsaicoyi locuxepa ÑanDios, ñne naihuejcopá quiftuca' liñpicuejma'. Toñiya ai'onñicopoxi to ñniya. Iya' ñnca aicainihuequi caituca' laipicuejma', quihuejma Cristo. Toñiya canant'ñi locuxepa ÑanDios. ²² Jouc'a ai'onñicopoxi to lapimaye pe aimicuec'eyi litaiqui' Jesucristo. Cahuay te co'iya metenñcocoyacola' ñan xanuc' ni petsi lomaná, ocuena ocuena liñraza, liñejma'. Cagua: Toñta'a cunñu'e'mola' hualca ñniya. ²³ Toñta'a laif'epa laipenic', ñe lalapi'ipa ÑanDios. Jahuay ñainunxajma' cuya'e' Lataiqui'. Cagua: ñe Lataiqui' tuya'e' te ts'ñic' lalapi'iyaconga'. Iya' jouc'a lapimaye lulijle ñe al c'a.

²⁴ ¿Te aicoñsina' lo'ipola' ñan xanuc' lalahuaiyacotñsi cainuya? Axpela' nainulpá, anuli nolijya, tepi'inni quipremio. Imanc' tolihuejle Cristo, tepi'itsolhuo' lolulijyacu. ²⁵ ñne pe notsuflaiyacu lofit'lyacu ti'e'motñsi cuenna, ti'ñta' acueca' quipujñxi, tulijle lafit'lya. Petsi nolijya tepi'im'me licorona lilanc'ecompa ipela c'ec. ñe al corona aimixnet'ñqui, tetetñquemma. ññanc' ja'ni lulijle, lalapi'inyaconga' aimijouya, ti'hua ticoñ tijauhuamlaicota. ²⁶⁻²⁷ Cal xans nonespa: "Culij'ma lalahuaiyacotñsi cainuya", ññque ac'a tinu'ma, tehuelonge pe locuaicoya. Toñta'a iya' cainihuequi Jesucristo. Iya' cacuxeyoxi. Lai'ejma' a'i to li'ejma' cal xans notsufaipa lafit'lya tuntafco'motñsi liñmane, tijouñta' ma tuntafque ñahua'. ññque ñnca aimulijya. Iya' cateñ'miyoxi. Cagua: ñta'a laicuerpo ti'ñta' quixina' ñe a'i

caipoujna. Ma' iya' caituca' cacuxe'moxi al c'a. Ja'ni a'i, ¿te co'iya? Iya' cola' ailopa'a calapi'inya tama nuya'a'ma Lataiqui'. Tope tope capanehuo.

10

¹ Unc'aipimaye, camilhuo' aimolimenc'eco'me li'ipola' lahtatahueló. Jahuay iñiya unxamu'ela' lummahuay lipo'nopa ËanDios lema'a. Jahuay uyalaico'me laja, ËanDios ilanc'e'epola' lihpene.

² Iñiya lunxamu'epola' lummahuay, nuyalaicopá laja, tohta'a i'ipola' lixanuc' Moisés. Jahuay ilihuequi iñque. ³ Jahuay iñe ma' anuli nitepá la'i, iñque hi'huayomma lema'a. ⁴ Jahuay ma' anuli noxnapá laja' lepi'ipola' ËanDios. Ihe laja' tipayomma lapic lipo'nopa ËanDios. Ni petsi loyepa lan xanuc' jouc'a ti'hua'ma lapic, tiyeyi anuli. Lapic ma' iñque Cristo. ⁵ Jahuay iñiya ËanDios itoc'i'mola' ma' anuli. A'i jahuay letenlcocopa ËanDios liñ'ejma'. Imanapola' jilpe lijul camats'. Tohta'a liteñ'mipola' ËanDios.

⁶ Ihe li'ipola' lahtatahueló ËanDios al'onkiconga' to illanc' lañ'iyaconga' ja'ni a'ij c'a lañ'ejma'. Lu'inga': "Tołpo'noñe lołpicuejma' aimoñjanaj'me molihuej'me lixcay to lihuejpa iñiya". ⁷ Imanc' aimolaxc'onñingolai'mola' landiosla'. Tohta'a li'epa hualca iñe lan xanuc'. Tuya'e' al Paxi Linilingiya ticua:

I'epá liñjuic landiosla', icutsołai'me, itetso'me, ixna'me.

Lijou'ma itsolinanca quixojma cata, i'e'me nixpiya.

⁸ Jouc'a aimoñ'noñ'mola' lacañ'no'. Hualca iñe lan xanuc' tohta'a li'epa. ËanDios iteñ'mi'mola'. Anuli

litine imana'mola' anuxans fane' mil lan xanuc'.
 9 Jouc'a aimolahuai'me laPoujna. Toŧta'a li'epa hualca iŧniya. LanDios umme'mola' lainofat'i. Iŧne ima'a'me lan xanuc'. 10 Jouc'a aimoŧtac'ui'me cajunac' LanDios. Hualca toŧta'a li'epa. LanDios umme'ma lepaluc quema'a, ima'a'mola'.

11 Jahuay iŧiya li'ipola' laŧtatahueló, LanDios aŧ'onŧiconga' to illanc' laŧ'iyaconga' ja'ni a'ij c'a laŧ'ejma'. Jiŧpe al Paxi Liniŧingiya LanDios aŧsc'ai'inga' illanc' laŧmana' iŧna'a liŧiné ma mi'hua mijou'ma li'a laŧmats'. Lu'inga' aima'e'me to iŧniya. 12 Toŧ'nujuaitsa li'ipola' laŧtatahueló. Ja'ni tocuca: "Iya' ma quihuequi. Ailopa'a caŧ'iya", iya' camihuo': Ne', topo'noŧa' cuenna. Aimixcai'mo'. 13 Itsiya toŧteŧcoyi ma le'a to laŧteŧcopa maŧmana' fa'a li'a laŧmats'. LanDios joupa lu'ipolhuo': "Iya' catoc'i'molhuo'". Toŧta'a lo'eya. Iŧque aimipaiya lipicuejma'. Ja'ni toŧsinyi acueca' iŧe loŧteŧcopa, ja'ni toŧnesle: "Aimi'iya caixnet'ŧconaya", LanDios timuc'i'molhuo' lonŧ'eyacu. Timuc'i'molhuo' te co'iya moluliyacu. Toŧta'a ti'hua toŧsnet'ŧme.

14 Maicunc'aipimaye, aimolihuej'me landiosla'. Tolanajtsoŧsi nulemma. 15 Imanc' a'i cunc'amac'ta. Tipa'a loŧpicuejma'. Itsiya aŧquim'ŧeŧa' iŧta'a laifmiyacolhuo'. Tijouŧa' toŧspic'ŧe al c'a lonŧ'eyacu. 16 Illanc' ninc'apimaye tipa'a laŧvaso, jiŧpe maŧsnayi aŧ'nujuaisyi li'epa Cristo. Aŧs'najtsi'i'me LanDios, aŧsna'me al vino lopa'a jiŧpe al vaso. Maŧsnayi al vino jahuay anuli aŧ'nujuaisyi lijuats' Cristo. Maŧteji la'i laŧsquejpa jahuay anuli aŧ'nujuaisyi licuerpo Cristo. 17 La'i laŧsquejpa ti'onŧocospa to licuerpo Cristo. Iŧque la'i ma le'a anuli. Toŧta'a timuqui tama ninc'xpela' illanc' ma

le'a anuli. Itque anuli la'i ahualca ahualca alteji jahuay.

18 Lan xanuc' Israel miteji lixic' litsufcompa jilpe al cuecaj xoute', ti'nujuaisyi ile al altar pe laipa'ayompa lixic' i'altar LanDios. 19 Linca aica'onhicola' lalanDios to lilendiosla'. Jouc'a aica'onhicola' lotsufcompola' lilendiosla' to lotsufcopa LanDios. 20 Mane cacua: Lan xanuc' pe aimimetsaicoyi LanDios aimitsufcoyi LanDios, titsufcoyi lontahue. Cacua: Amotetso'me anuli lontahue, aimohejmale'me anuli ihniya. 21 Imanc' ja'ni tolsnayi livaso laPoujna Cristo aimi'ya molnsayacu jouc'a livaso ilne lontahue. Ja'ni toltetsoyi jilpe lacui'impa "limesa laPoujna", toltetsoyi anuli itque. Aim'ya moltetsoyacu anuli lontahue jilpe limesa. 22 O, ¿ja'ni lahuaile laPoujna? ¿Ja'ni xonca ti'hua lahmane?

23 Linca tama jahuay nipajnya al'e'me, tipa'a latentocoya jouc'a tipa'a pe aimetentocojma. Tama jahuay nipajnya al'e'me a'i jahuay mitoc'iyacola' lapimaye. 24 Imanc', aimol'e'me loipic'a coltuca'. To'e'me ile lotoc'iyacola' loipimaye.

25 Locuquimpa laplaza ti'i'ma tolnata, tolte'me. Aimolsuehlot'le'me, aimolicuitsuf'me: "¿Te ile litsufcompola' landiosla'?" Ma le'a tolnatsa. 26 To'nujuaitsa: "Li'a lamats' jouc'a jahuay lopa'a i'huexi laPoujna".

27 Lan xanuc' pe aimimetsaicoyi LanDios, ja'ni tijoc'itsolhuo' toltetsota, ja'ni oipic'a tonlele, ne', tonle'me. Toltetsa lapi'inyacolhuo'. Aimolsuehlot'leta, aimolicuitsufol'me: "¿Te ilta'a itsufcompola' landiosla'?" Ma le'a toltetsa.

28 Ja'ni anuli lołpima timitsolhuo': "Itta'a itsufcompola' landiosla', aimi'iya mołtejacu", aimołte'me. Toł'nujuaitsa lołpima limipolhuo' tołta'a. Aimołscai'e'me ilque lunxajma'. 29-30 Imanc' linca aimołsuetcoyacu, ma' ilque lołpima tixhuełco'ma.

Iya' cacua: Linca nipajnya tołte'me. Tijouła', ¿te co'iya? Lołpima aga tixim'ma a'ijc'a loł'epa, tihuotso'ma. Joupa ołs'najtsi'ipá LanDios, tołteji moł'nujuaisyi LanDios, lołpima aikuixoqui queta, ix-tuc'opo'. ¿Ja'ni ac'a ite li'ipa? A'i.

31 Cacua: Ja'ni tołte'me, ja'ni tołsna'me, jahuay lonł'eyacu, tonł'ete ma le'a latenłcocoya LanDios. Tołta'a lan xanuc' tines'me: "ŁilenDios itniya ma' ac'a lipicuejma'". 32 Ja'ni ajudío o ja'ni a'ij judío, o ja'ni lołpimaye łefot'łepola' LanDios, imanc' aimoluc'uilituf'e'mola'. 33 Tołta'a laif'epa iya'. Ca'nujuaitsila' jahuay laif'as xanuc'. Aicacua: "¿Te caif'eya? Aipic'a cuyaiła' al c'a iya'." Ma caxpic'e, camiyoxi: "Itte laif'eya, ¿te tetenłcocojma laipima?" Aipic'a tuyalaite al c'a laipimaye, tunłul—le itniya.

11

1 Tołta'a cainihuequi Cristo. Imanc' lihuejla' iya'.

2 Unc'aipimaye, tixoqui neta iya' aixina' aicalimenc'ecojma. Ti'hua al'nujuaitsi, ma to lałcuxe'epolhuo' tołta'a lonł'epa. Tonlihuejyi laimuc'ipolhuo'. 3 Jouc'a aipic'a ti'ila' cołsina' Cristo copa'a Nocuxepa cal xans. Cal xans ti'hua limane ticuxe'ma łaca'no', ilque lipeno. LanDios ti'hua limane ticuxe Cristo. 4 Cal xans mipalaic'o LanDios o mu'iyale lonespa LanDios, texijla' lijuac. Ja'ni tetemica lijuac tetets'i Cristo, ilque Nocuxepa. 5 Łaca'no' mipalaic'o LanDios o

mu'iyale lonespa ŁanDios, tetemijla' hijuac. Ja'ni texijla' hijuac tetets'i hipe'ailli', itque nocuxepa. Ja'ni texijla' hijuac tocomma to isuaf'pa. ⁶ Ja'ni łaca'no' aimetemijya hijuac, ne', tetec'ełta' hijuac. Ja'ni ticua: "A'i, aimalatec'e'ma łaijuac, aimalisuaf'ma, catai'ma lalaic'ata", ne' tetemijla' hijuac.

⁷ Cal xans mipalaic'o ŁanDios aimetemij'ma hijuac. Cal xans ti'onłcospa to ŁanDios. Timuqui te ts'i'ic' itque Łilanc'epa. Łaca'no' ituca', itque tixhuaicospa hipe'ailli'. ⁸ ŁanDios lolanc'eyacola' lan xanuc' ate'a ilanc'epa cal xans, a'i łaca'no'. Itque łaca'no' aikuipa'e anuli lipecał lolanc'ecoya cal xans. Ipa'epa lipecał cal xans ilanc'ecopa łaca'no'. ⁹ ¿Ja'ni łaca'no' ehue'epa quipe'ailli' lijoupa ŁanDios ilanc'epa cal xans? A'i. Cal xans ehue'epa quipeno. Lijoupa ŁanDios ilanc'epa łaca'no'. ¹⁰ Toliya ticuicomma tetemijla' hijuac łaca'no'. Timuj'ma a'i micuxeyoxi itque quituca'. Timuj'ma hipe'ailli' xonca ti'hua limane. Tołta'a tetenłcoco'mola' lapaluc' quema'a jouc'a. Iłne nahuelojmpá lapimaye lafot'łepołtsi.

¹¹ Iya' aicatets'ila' lacał'no'. Cacia: Ticuicomma loquexi', cal xans jouc'a łaca'no'. Cal xans ticuicomma quipeno, łaca'no' ticuicomma quipe'ailli'. Tołta'a lapajnya molihuejyi łapoujna.

¹² Tołta'a ałmuc'iponga' ŁanDios: Al te'a ipa'apa łaca'no' licuerpo cal xans. Lijoupa limajnlita lan xanuc' iłne caipalyomma liłcuerpo lacał'no'. Jahuay, ma' anuli ŁanDios tepi'ila' liłpitine, axanuc', acał'no'.

¹³ Imanc' coltuca', ¿te colcuapa? ¿Te ja'ni ac'a lo'epa łaca'no' mipalaic'o ŁanDios exiqueya hijuac? ¿Te ja'ni latentłcocoya tołiya? ¹⁴ Joupa ołsina' a'ij

nuli lihsans łaca'no' y cal xans. Cal xans ja'ni itoqui juaiconapa ĩjuac, aikuetenłma, alaic'ata. ¹⁵ Łaca'no', ja'ni itoqui juaiconapa ĩjuac, ma' etenłma, i'huáqui ac'a juaiconapa. ĩque ĩtoqui ĩjuac ŁanDios epi'icopa łaca'no' tipoxc'ixoxi. ¹⁶ Tołta'a iya' laicuapa, lainu'ipolhuo'. Ja'ni anuli aimicueca, ja'ni tinesla': "Łacał'no' mipalaic'oyi ŁanDios aimetemij'me ĩĩjuac", cami'ma ĩque: "ĩllanc' a'i tołta'a mał'eyi. Jouc'a aimi'eyi lapimaye lefot'łepola' ŁanDios ni petsi lomana'."

¹⁷ ĩtsiya capalaico'molhuo' lonł'epa pe aicalatenłcocojma. Aicamilhuo': "Ac'a ĩte loł'ejma". Munlafot'łeyołtsi aimołtoc'iyołtsi, aimołfa'eyołtsi lołpicuejma'. Lijou'ma xonca a'ijc'a loluyalaicopa. ¹⁸ Ate'a cu'i'molhuo' ĩte lonescompolhuo', ałmimpa: "Lapimaye nomana' ĩłya' Corinto mefot'łeyołtsi a'ij nuli ĩłpicuejma', a'ij nuli lonespa". Iya' cacua: Aga al ĩnca ĩte łataiqui' lonescompolhuo'. ¹⁹ ĩnca aimi'iya mołmajnyacu ma le'a anuli capicuejma'. Ticuicomma tołanajtsołtsi. Tołiya ti'huájtola' naitsi ĩłniya latenłcocoja ŁanDios.

²⁰ Imanc' lonlafot'łepołtsi anuli aicołpic'e mołtetsoyacu ĩximocojma' łalPoujna. ²¹ Imanc' aimoł'huaicoyi anuli anuli, ma tołteji łołtaic'. Tijouła' anuli łapima tipanehuo tunle'e, łocuena timeyoqui. ²² Imanc', ¿te ailopa'a colajut'łi? ĩłpiya ti'łma tołtetsota, tołsnata. Xonca ołpic'a tolatets'itsola' lołpimaye, ĩłniya jouc'a lefot'łepola' ŁanDios. Imanc' tołahuelongila' to ninaitsi xanuc', tijouła' ĩłniya tixinyi calaic'ata juaiconapa.

¿Te caifmiyacolhuo'? ¿Te cami'molhuo': "Ac'a lonł'epa"? A'ı, aicamiyacolhuo' tołta'a.

²³ Iya' joupá aimuc'ipolhuo' ile lahmipa laPoujna. Nu'ipolhuo': Lipuqui' licum'me laPoujna Jesús itque epef'ma anuli la'i. ²⁴ Ix'najtsi'i'ma LanDios, ixquej'ma la'i, timila' ts'ilihuequi': "Ita'a aicuerpo. Cacumoxi, cunlu'e'molhuo'. Ma tohta'a tonl'e'me imanc'. Tohsquej'me la'i, tohte'me, al'nujuaisco'ma iya'." ²⁵ Lijoupa lixmocopa laPoujna timila' ts'ilihuequi': "Ita'a al vaso, al vino lonango, ile aijuats' laifxcuajaiya. Tohiya calinc'i'ma al ts'e cataiqui' lopo'no'ipolhuo' LanDios, imanc' ixanuc'. Tohsnate. Ti'hua tonl'e'me tohta'a. Ma mohsnaye al'nujuaisco'ma."

²⁶ Mal'eyi tohta'a, malteji la'i lahsquejpa, mahsnaye al vaso, luya'ayi limayopa laPoujna jilpe lancruz. Ma tohta'a mal'eyi al'huijma ticuaiyoconno. ²⁷ Tohiya aimi'iyá maltejacu la'i to nij tintsí ca'i, aimi'iyá mahsnayacu al vino to nij tintsí vino. Ja'ni tohta'a li'ejma' cal xans, itque tetets'ila' licuerpo jouc'a lijuats' laPoujna.

²⁸ Ai'a tohte'me la'i, ai'a tohsna'me al vino tolimet-saicotsoltsi, te ts'i'ic' lo'ejma', te ts'i'ic' lo'picuejma'. Tijoula' tohte'le la'i, tohsnate al vino. ²⁹ Naitsi notepa la'i, noxnapa al vino, ja'ni aimimetsaijma jilpe licuerpo Cristo, litepa la'i, lixnapa al vino aimi-toc'iyá. Titelco'ma lote'l'miya LanDios. ³⁰ Tohiya, jilpe pe lo'mana' timana' axpela' lapimaye titafquem-mola', axpela' textafquila' o joupá imanapola'.

³¹ Limetsaicotsoltsi, ahsintsoltsi te ts'i'ic' la'ejma'. Ja'ni a'ijc'a la'ejma' ahsuej'menanca. Tijoula' aimalte'l'miyaconga' LanDios. ³² Ja'ni alte'l'minga' LanDios ahmuc'inga' aimetenl'ma la'ejma', ipic'a ahsuej'menanca. Tohta'a aimalacani'eyaconga' to locuenaye naihuejpa' quiltuca' li'picuejma'.

33 Unc'aipimaye toł'nujuaitsa ihe laifnu'ipolhuo'. Litine molafot'leyacołtsi, tołtetso'me anuli, tołcuaitsa petsi lolafot'leyacołtsi, toł'huaicota ticuaiyunca lołpimaye, tijouła' tołtetso'me. 34 Łapima łonle'epa juaiconapa, titetsoła' jilpe lejut'ł. Tołta'a ac'a toluyalaico'me jilpe lolafot'łepołtsi. ŁanDios aimitel'miyacolhuo'.

Litine cacuaitsi jilpiya ałpalaic'otołtsi xonca. Cata-lai'etolhuo' jahuay lalicuis'epa.

12

1 Unc'aipimaye aipic'a ti'ila' cołsina' te ts'i'ic' lał'eyacu ja'ni cal Espíritu ałcuxenga', lapi'iponga' lałpicuejma'. 2 Imanc' toł'nujuaisyi te ts'i'ic' loł'ejma' ihe łitiné ma' aimolimetsaicoyi ŁanDios. Icuxe'molhuo' landiosla' pe aimipalaiyi. Unlihuejco'me ihiya. 3 Ihe łitiné aicołsina' litaiqui' cal Espíritu Santo. Itsiya camilhuo': Cal xans nonespa: “Tecaniła' Jesús”, aiminesqui locuapa cal Espíritu Santo. Jouc'a camilhuo': Ma le'a cal xans pe joupá epenufpa cal Espíritu Santo ti'i'ma tuya'a'ma: “Jesús aiPoujna. Małque anDios.” Ja'ni aiquepenufi cal Espíritu Santo aimi'iya muya'aya tołta'a.

4 Tama ituca' ituca' lał'eyacu ma to malapi'inga' cal Espíritu, ailopa'a oquexi' afantsi lan Espíritu Santo, ma' anuli le'a. 5 Tama ituca' ituca' lałpenic', ihe lałtoc'iyacola' lałpimaye, ma le'a anuli lałPoujna. 6 Tama a'ij nuli calapi'inga' lałmane, iłque ŁanDios ma le'a anuli. Ma' iłque lapi'inga' jahuay ihiya. Tołta'a ałpaxnenga' jahuay illanc'.

7 Cal Espíritu Santo ałmuc'inga' lał'eyacu anuli anuli illanc'. Tołta'a illanc' ninc'apimaye ti'i'ma

altoc'i'mołtsi. ⁸ Anuli łapima, cal Espíritu Santo tepi'i'ma tuhual'ma litaiqui' ŁanDios. Łocuena capima, małque cal Espíritu Santo tepi'i'ma tuya'a'ma al cueca' ts'ixina'. ⁹ Łocuena capima, małque cal Espíritu Santo tepi'i'ma ti'huaiyijnla' juaiconapa łapoujna Jesucristo. Łocuena capima, małque cal Espíritu tepi'i'ma limane tixał'me'mola' lafcuallay. ¹⁰ Łocuena capima, tepi'i'ma ti'ela' al cueca' ma to mi'ay ŁanDios. Łocuena capima, tepi'i'ma ti'ıla' quixina' loxpíc'epa ŁanDios, tu'itsola' lapimaye. Łocuena, tepi'i'ma timetsaicoła' ja'ni ma' alinca cal Espíritu Santo ticuxe anuli łapima o ja'ni ticuxe ocuena 'espíritu, itque łixcay. Łocuena capima, tepi'i'ma tipalaıla' ipaijma litaiqui' pe aikuixina'. Łocuena capima, tepi'i'ma ticuejla' ite lataiqui' linespa łipima, tu'itsola' locuenaye capimaye. ¹¹ Jahuay itiya ti'ay cal Espíritu Santo. Ituca' ituca', ma to lixpíc'epa, łapi'inga' łapicuejma' jouc'a łal'eyacu.

¹² Anuli al cuerpo linca axpe' mipa'a. Tama axpe' mipa'a licuerpo cal xans a'i oquej fanej licuerpo, anuli le'a. Tołta'a Cristo. Illanc' icuerpo itque. ¹³ Illanc' ja'ni ninc'ijudío, ja'ni ninc'ocuenaye xanuc', ja'ni fa'a li'a lamats' tipa'a łapoujna o ailopa'a calpoujna, illanc' nalapolipá al'onłcosponga' to anuli al cuerpo, ite icuerpo Cristo. Ma' anuli joupá alsnapá al c'a caja', itque cal Espíritu Santo łalapenufpa.

¹⁴ Linca, anuli al cuerpo mipa'a axpe', a'i anuli ne'a. ¹⁵ Cal xans ja'ni li'mis timixoxi: "Iya' a'i namane, tołta'a iya' a'i qui'huexi ite al cuerpo", ¿te ite li'mis a'i qui'huexi al cuerpo? ¹⁶ Jouc'a

ja'ni lix'mas timixoxi: “Iya' a'i na'u, tołta'a iya' a'i qui'huexi iłe al cuerpo”, ¿te iłe lix'mas a'i qui'huexi al cuerpo?

¹⁷ Ja'ni lałcuerpo pangay ca'u, ¿te co'iya małcuejyacu? Ja'ni lałcuerpo pangay cax'mats'i, ¿te co'iya malujuenufyacu? ¹⁸ A'i tołta'a lałcuerpo. ŁanDios joupa ixpic'epa lo'eya, ipo'no'ipola' anuli anuli pe lopanc'eya. ¹⁹ Ja'ni a'i coła' tołta'a qui'e'e ŁanDios, ¿pe copa'a al cuerpo? Ailopa'a.

²⁰ Łınca axpe' tipa'a lipo'no'ipola' ŁanDios, tama anuli le'a lałcuerpo. ²¹ Totiya lał'u' aimi'iya mimiya lałmane': “Aicaxhuicolhuo'. Tonłenłe'. Iya' caituca' ca'e'ma lanic'.” Jouc'a lałjuac aimi'iya mimiya cola' lałmitsi': “Aicaxhuiyacolhuo'. Tonłenłe. Iya' caituca' ca'e'ma lanic'.” ²² Jiłpe lałcuerpo ticuicomma jahuay lipo'no'ipola' ŁanDios. Iłniya pe tocomma ailopa'a quiłpujfxi, iłne xonca ticuicomma. ²³ Jiłpe lałcuerpo tipa'a pe aimalimetsaicoyi xonca, jiłna'a xonca ał'eyi cuenna. Jouc'a iłna'a petsi ticuicomma temiyaquenni aimalixocoyi iłniya. ²⁴ Pesti xonca latenłcoconga' aimalsinyi cuanuc', aimalamiyi.

ŁanDios lilanc'epa lałcuerpo ixpic'epa petsi lopo'no'iyacola' anuli anuli. Ja'ni ipic'a temiyaquenni, ti'enłe cuenna, ipo'nopa małpe petsi ał'e'me cuenna. ²⁵ Tołta'a, jiłpe lałcuerpo anuli aimi'iya miłof'eyacoxi, locuena mi'oc'eyacoxi. Jahuay tixinyołtsi cuanuc', jahuay ti'eyołtsi cuenna. ²⁶ Ja'ni lałcuerpo tipa'a anuli titełma, jahuay titełcoyi jouc'a. Ja'ni anuli tixoque queta, jahuay tixojma quileta.

²⁷ Tołta'a imanc', icuerpo Cristo. Anuli

anuli imanc' i'huexi ìte licuerpo. ²⁸ Jahuay nalafot'leponga' ÌanDios lapi'iponga' anuli anuli lałpicuejma', ituca' ituca' lałpenic'.

Ate'a ipo'nopola' lan apóstole, ìne lummepola' Cristo tuya'ale Lataiqui'. Lijoupa ipo'nopola' lam profeta, ìne tuya'ayi lataiqui' lomipola' ÌanDios. Lijoupa ipo'nopola' lomxiye, ìne tuhuałyi Lataiqui', timuc'iyaleyi. Lijoupa ipo'nopola' ìne petsi lepi'ipola' liłmane, ti'e'me ma to lo'epa ÌanDios. Lijoupa ipo'nopola' ìne petsi lepi'ipola' liłmane tixał'mełe lafcuałay. Lijoupa ipo'nopola' ìne pe lepi'ipola' liłpicuejma' titoc'ìte liłpimaye. Jouc'a ipo'nopola' ìne pe lepi'ipola' liłpicuejma' ticuxe'me liłpimaye, tu'i'mola' te co'iya mi'eyacu lanic' lepi'ipola' ÌanDios. Jouc'a ipo'nopola' ìne pe lepi'ipola' liłpicuejma' tipalaìte ipaijma liłtaiqui'.

²⁹ ¿Te jahuay illanc' ninc'apóstole? ¿Te jahuay ninc'iprofeta? ¿Te jahuay ninc'omxiye? ¿Te jahuay ał'eyi al cueca' ma to lo'epa ÌanDios? ³⁰ ¿Te jahuay ałsał'mela' lafcuałay? ¿Te jahuay ałpalaiyi ipaijma lałtaiqui'? ¿Te jahuay nipajnya ałcuj'me loya'apa lapimaye nopalaipá ipaijma lataiqui'? A'ì. Ituca' ituca' mi'hua lałmane, ituca' ituca' lałpicuejma' lalapi'iponga'. ³¹ Imanc' tołpo'note lołpicuejma', tołsahue'ete ÌanDios tepi'itsolhuo' al c'a juaiconapa.

Itsiya camuc'i'molhuo' te ts'i'ic' ał'ejma' xonca al c'a.

13

¹ Iya cacua: Tama ałpalai'me liłtaiqui' lan xanuc' jouc'a liłtaiqui' lapaluc' quema'a, tijouła', ja'ni aimal'ehualeyì capic'a, ìte lałpalaipa ailopa'a

quipenic'. Tocomma ma le'a luna'anga' to latengoyi latejma' o latsajnyi loquej latehuaijma'.

² Ja'ni ninc'iprofeta, lu'iyaleyi lałmiponga' ŁanDios, ja'ni ałcueca' xonca lipime litaiqui' ŁanDios, ja'ni joupa acueca' i'ipa całsina', ailopa'a calahue'eponga', ja'ni acueca' ał'huaiyijnyi ŁanDios, tołta'a ałcuxe'mola' hijualay, ihniya tiye'me lu'hua, tijouła', ja'ni aimal'ehualeyi capic'a, ¿te quipenic' ihya? Illanc' ał'onłcotonga' to nij naitsi xanuc'.

³ Ja'ni jahuary lał'huexi lapi'i'mola' titetsołe ihne petsi aiqUIL'hueca, ja'ni ałcu'mołtsi ałtel'mitsonga' acueca', ałma'atsonga', ałpi'etsonga' nulemma, tijouła' ja'ni aimal'ehualeyi capic'a, ¿te quipenic' ihya? ŁanDios aimetenłcocoya lał'epa. Ailopa'a calapi'inyaconga'.

⁴ ¿Te cał'eyacu lał'ejma' ja'ni ał'ehualełe capic'a? Mał'ehualeyi capic'a ałsnet'ł'me juaiconapa jahuary lał'e'eyaconga', ałpalaic'o'mola' al c'a, aimal'eyacola' laic', aimalnescoyacołtsi al c'a, aimal—loł'eyacołtsi.

⁵ Aimal'eyacu nixpiya, aimal'eyacu lalatenłcocoyaconga' illanc' całtuca'. Aimalixtulecocyacu, aimal'nujuaisyacu ja'ni a'ijc'a lał'eponga'. ⁶ Aimixojya calata ja'ni timenaquila' lapimaye, linca tixoj'ma calata ja'ni lałpimaye tihuejcoyi al linca cataiqui'. ⁷ Ti'hua ał'ela' capic'a, aimalxojyaconga'. Ał'huaiyijm'mola'. Ał'huaiicotola' ma ti'ele al c'a. Jahuary lał'eyaconga' ti'hua ałsnet'ł'me.

⁸ Ja'ni ał'ela' capic'a, tama itsiya litine o Locuena Quitine ti'hua ał'e'mola' capic'a. Ite lał'ejma' aimi-jouya. Tijauhuamlaicota quitine tołta'a ał'e'me.

Itsiya litine lam profeta tu'iyaleyi lu'ipola' ŁanDios, Locuena Quitine a'i, aimuya'aconayacu tołta'a. Itsiya litine lapimaye tipalaiyi ipaijma

liłtaiquí, Locuena Quitine a'i, aimipalaiconayacu tołta'a. Itsiya tocomma tipa'a lałsina', Locuena Quitine a'i. Aimal'nujuaisyacu iłiya. ⁹ Itsiya ma le'a a'onłca lałcueca, ma' a'onłca laluponga' ŁanDios, tołta'a lu'iyaleyi. ¹⁰ Locuena Quitine a'i. Jahuay ałsim'me, jahuay lu'i'monga' ŁanDios. Petsi joupa lixhuaita hualca ailopa'a.

¹¹ Ti'i'ma ma to iya' lał'ipa. Iya' maj na'hua, ilne litiné ma to tixpic'eyi laif'as ca'uhuyay ma' anuli caxpic'e iya'. Tołta'a laipicuejma', laitaiqui'. Lijoupa lałjpa aicainihuequi ila lai'ejma' ma na'hua. ¹² Itsiya afule małcuejyi. Tocomma to lahuelojnyi anuli lahuejma' catejma', ila lalahuelojmpa tocomma to cua naitsi ipunxahua. Afule qui'huáqui. Locuena Quitine a'i. Ałsim'me acuajmaica. Itsiya ma' a'onłca ałsina', ma' a'onłca ałcuec'eyi. Locuena Quitine a'i. Ma to ŁanDios limetsaiconga' itsiya, ma tołta'a limetsaico'me ŁanDios.

¹³ Linca itsiya y tijauhuamlaicota litine, ti'hua ał'huaiyjm'me ŁanDios, ti'hua ał'huaico'me al c'a, ti'hua ał'ela' capic'a lałpimaye jouc'a ŁanDios. Tama jahuay ila lał'ejma' aimijouya, tetenłcocojma ŁanDios, ila mał'ehualeyı capic'a xonca tetenłcocojma, ŁanDios tixina ila xonca al c'a.

14

¹ Tołpo'nołe lołpicuejma' tonł'etsola' capic'a lołpimaye. Jouc'a tołsahue'ele cal Espıritu Santo tepi'itsolhuo' cołmane cołpicuejma'. Xonca tołjanajle, tołsahue'ele ti'etsolhuo' profeta, tepi'itsolhuo' lołpicuejma' tolu'itsola' lapimaye lataiqui'

lomiyacolhuo' ÑanDios. ² Ñapima nopalaipa ipaijma litaiqui', iñe lapi'ipa cal Espíritu Santo a'i ma quitaqui', iñque tipalaic'o'ma ÑanDios. Lan xanuc' aimicuec'e'me. Cal Espíritu Santo ticuxe lipicuejma', iñe pe noquimf'epá aimi'ya muhualqueyacu lonessa, aimuhualqueyacu loya'apa. ³ Ñapima ja'ni aprofeta, iñque tipalaic'ola' lan xanuc', xonca tifa'ela' liñpicuejma', tixc'ai'ila', tixoc'ila' quileta. ⁴ Ñapima nopalaipa ipaijma litaiqui' xonca tifa'eyoxi quituca' lipicuejma'. Cal profeta lopalaipa xonca tifa'ela' liñpicuejma' lipimaye, jahuay iñniya nafałumma.

⁵ Camilhuo': Ja'ni jahuay imanc' ipaijma ipaijma loñtaiqui' toñpalai'me, ñinca tixoj'ma neta iya'. Xonca tixoj'ma neta ja'ni coñ'a' jahuay unc'iprofeta. Ñapima nopalaipa ipaijma litaiqui', iñe lepi'ipa cal Espíritu Santo, ja'ni timuc'ila' lapimaye te ts'i'ic' linespa, acueca' al c'a lo'epa, acueca' titoc'ila' lipimaye, tifa'ela' liñpicuejma'. Ja'ni aimi'ya mimuc'iyacola' loya'apa iñe linespa, litaiqui' aimitoc'ila' lipimaye. Xonca acueca' al c'a ti'e'ma cal profeta, lapimaye ticuec'eyi iñque. ⁶ Unc'aipimaye, cacuaitsi jilpiya, ja'ni capalay pangay ipaijma laitaiqui', ¿te ja'ni catoc'i'molhuo'? A'i. Ticuicomma cu'itsolhuo' lañmuc'ipa ÑanDios, o cu'itolhuo' laixina', o cu'itolhuo' lañmipa ÑanDios, o camuc'itolhuo'. Ja'ni toñe ca'etsi, ñinca catoc'itolhuo'.

⁷ Iñiya al pito o al 'arpa, tama aiquilmaf'i', ja'ni tifus'minñe al pito o tunanñe al 'arpa tocomma to tipalaiyi. Ticuicomma tifus'minñe o tunanñe al c'a. Ja'ni a'i, aimi'ya micuejyacu te loya'apa.

⁸ Tijoc'int sola' lan soldado ticuaiyunca tifuleta,

ja'ni a'i munanni al c'a al trompeta, ¿te ticuec'e'me lan soldado? A'i. Aimicuec'eyacu.
 9 Jouc'a imanc', ja'ni tołpalaiyi ipaijma lołtaiqui' iłne noquimf'epolhuo' aimi'iya quilsina' te ts'i'ic' loluya'apa. Tocomma to tołpalaic'oyoltsi cołtuca', to tołpalaic'oyi łahua' le'a.

10 Linca, fa'a li'a łamats' tipa'a axpe' quıltaiqui' lan xanuc'. Anuli anuli tipa'a loya'apa.

11 Małpalaic'o'moltsi ja'ni aicałcuc'eyoltsi, ¿te iya' latentłcoco'ma iłque linespa? O iłque, ¿te tetenłcoco'ma iya' lainespa? A'i, aimalsinc'neyacoltsi. Caxim'ma iłque to aine, iłque ałsim'ma to naine. 12 Imanc' ma tołta'a lo'ipolhuo' jilpe.

Ja'ni juaiconapa tołjanajyi łocupa cal Espíritu Santo tołsahue'ete tepi'itsolhuo' cołmane, cołpicuejma' tołtoc'itsola' lołpimaye, tołfa'etsola' liłpicuejma'. 13 Łapima nopalaic'opa ŁanDios, ja'ni tipalay ipaijma litaiqui' jouc'a tixahue'ełta' cal Espíritu Santo tepi'ila' lipicuejma' tu'itsola' lapimaye loya'apa iłe lonespa.

14 Iya' ma capalaic'o ŁanDios ipaijma litaiqui' lalapi'ipa cal Espíritu Santo, linca tama jilpe łainunxajma' aixina' capalaic'o ŁanDios aicaixina' loya'apa laifnespa, tołta'a aicatoc'ila' laipimaye.

15 ¿Te caif'eya? Capalaic'o'ma ŁanDios ipaijma litaiqui', ma to małcuxe cal Espíritu Santo, jouc'a cu'i'mola' laipimaye loya'apa iłe laipalaic'opa ŁanDios. Cunac'co'ma ŁanDios ipaijma litaiqui', ma to małcuxe cal Espíritu Santo, jouc'a cu'i'mola' laipimaye loya'apa iłe lainunac'copa ŁanDios.

16 Ima', mox'najtsi'i ŁanDios ja'ni ma le'a ipaijma

lotaiqui', ¿te co'eya cal xans noquimf'epa, itque pe aimihuequi? Aimicuec'eya lofnespa. ¿Te co'iya minesya: “Amén, tole ti'ila'”? A'i, aimi'iya. ¹⁷ Ima' linca juaiconapa ac'a ox'najtsi'ipa LanDios. Lopima ipanemma ma to mipa'a. Aicofa'e lipicuejma'.

¹⁸ Cax'najtsi'i LanDios iya' culiquilhuo' imanc'. Capalay xonca ipaijma laitaiqui'. ¹⁹ ¿Te co'iya? ¿Te ja'ni capalai'ma pangay ipaijma laitaiquí jilpe lalafot'leyopoltsi anuli laipimaye? A'i. Tama ni-pajnya capalaila' imbamaj mil lataiquí, ite ipaijma laitaiquí, xonca aipic'a capalaila' ma le'a amaquej lataiquí ma le'a laitaiqui'. Tofta'a alcuec'e'ma lapimaye, camuc'ila'.

²⁰ Unc'aipimaye, aimonlihuej'me li'ejma' la'uhuay. Itne aiquicuaiya quipicuejma'. Linca ma to mi'eyi lan tsocay, itne pe aimihuejyi lixcay, imanc' jouc'a ti'ila' tofta'a lo'ejma'. To'nujuaitsa tipa'a lo'picuejma', to'pic'e'le al c'a. ²¹ Petsi linijmpa loya'apa locuxepa LanDios ticua:

LanDios tuya'e': “Itne petsi aimepenufyi laifmuc'ipola',

cumme'e'mola' lan xanuc' ocuena quitraza, ituca' quilitaiqui', itniya tu'innola' laifnuya'apa.

Tijoula', tama tiquimf'e'me ma' anuli tuyalaico'me, aimihuejyacu.”

²² LanDios ipic'a timujla' nulemma naitsi itne aimi'huaiyijnyi. Tofta'a ummepola' nopalaipá ipaijma litaiqui'. Lummepola' a'i mimujyacu naitsi itne no'huaiyijmpá. Lam profeta, itne linca timuc'iyaleyí no'huaiyijmpá, a'i petsi aimi'huaiyijnyi.

²³ Itsiya, ¿te co'iyá? Cacia: Pesti lolafot'lepotsi anuli, jahuay tołpalaiyi ipaijma ipaijma lołtaiqui', iłe lepi'ipolhuo' cal Espíritu Santo, tijouła' titsuflaile iłne pesti aimicuec'eyi iłe loł'ejma' o pesti aimihuejcoyi ŁanDios, ¿te cocuayacu? Tines'me: "Iłne ma' amac'ta". ²⁴ Ituca' lo'iyá ja'ni jahuay imanc' toluya'ayi iłe lu'ipolhuo' ŁanDios. Titsufaila' anuli pe aimihuejma ŁanDios, o aimihuequilhuo' imanc' lonł'ejma', iłque tiquimf'e'molhuo' anuli anuli imanc' lołnespa. Lołtaiqui' titsufai'ma lipicuejma' iłque cal xans. Tołta'a tixhuj'menahuo, ti'i'ma quixina' te ts'i'c' li'ejma'. ²⁵ Lemiya jilpe łunxajma' ti'huájta. Tijouła' text'onłquehuo tixpats'huaita łamats', tix'najtsi'i'ma ŁanDios, tuya'e': "Łinca ma fa'a tipa'a ŁanDios".

²⁶ Itsiya, cunc'aipimaye, ¿te co'iyá? Jilpe molafot'leyołtsi, jahuay imanc' anuli anuli tipa'a lołpalaiyacu. Anuli tunac'co'ma ŁanDios, łocuena tipa'a lomuc'iyacola' lapimaye, łocuena tu'i'mola' lapimaye te ts'i'ic' iłe lu'ipa ŁanDios, łocuena tipalai'ma ipaijma litaiqui', iłe lepi'ipa cal Espíritu Santo, łocuena tipa'a lipicuejma' tuhual'ma iłe lipaijma lataiqui', tuya'a'ma te loya'apa. Ne', jahuay iłna'a ti'i'ma tonł'e'me ja'ni tołta'a tołtoc'i'mola' lołpimaye, ja'ni tołfa'e'mola' iłniya liłpicuejma'.

²⁷ Ja'ni tołpalai'me ipaijma lołtaiqui', iłe lepi'ipolhuo' cal Espíritu Santo, tołpalaile oquexi' afantsi le'a, xonca a'i. Anuli anuli tołpalai'me. Tijouła' anuli łapima tu'i'mola' lapimaye te loya'apa iłe lipaijma lataiqui'. ²⁸ Jilpe, ja'ni ailopa'a anuli no'iyalepa tołta'a, aimołpalaiyacu ipaijma lołtaiqui'.

Ma jilpe lołpicuejma' tołpalaic'o'me ŁanDios.

²⁹ Jouc'a lam profeta, tipalai'me oquexi' afantsi le'a, xonca a'i. Locuenaye lapimaye noquimf'epá tixpif'me, ti'ila' quilsina' ja'ni itaiqui' ŁanDios o a'i. ³⁰ Mipalaic'olhuo' łalpima ja'ni aprofeta, ja'ni ŁanDios tu'ila' o timuc'ila' łocuena capima nocutsuya jilpe, ilque nopalaic'opolhuo' ti-ch'ixco'ma. Tipalaic'otsolhuo' łocuena capima, tu'itsolhuo' lu'ipa ŁanDios. ³¹ Tołta'a jahuay lapimaye tolihuic'i'me, jahuay tixpai'i'mola' cunlata.

Imanc' unc'iprofeta nipajnya tołcuxe'mołtsi al c'a, tołpalai'me anuli anuli. Ai' jahuay mołpalolai'me. ³² Łapima ja'ni aprofeta ti'hua limane ticuxe'moxi. Ti'i'ma tixpic'e'ma ja'ni tipalaia' o ja'ni aimipalaiya. ³³ ŁalanDios aimal'eyaconga' lahuoc'aitsoltsi. Ilque alpac'e'enga' łalpicuejma'. Ja'ni imanc', ja'ni ocuenaye lapimaye, ni petsi lolafot'łepołtsi tołta'a li'ejma' ŁanDios.

³⁴ Molafot'łeyołtsi anuli aimipalai'me lacał'no'. Aimi'onhico'mołtsi to lan xanuc'. Tihuejcołe. Pe liniiya locuxepa ŁanDios tołta'a tuya'e'. ³⁵ Ilne łalpmimaye cacal'no', ja'ni jilpe hilejut'hi małpiya ti'i'ma ticuis'eta liłpe'aillí. Pe lolafot'łepołtsi aimipalai'me lacał'no'. Ille a'ijc'a, aimetenłma. ³⁶ Imanc' unc'iCorinto, aimolihuejcola' locuenaye łalpmimaye lił'ejma'. ¿Te ma imanc' cołtuca' tołcuxe'mołtsi? ¿Te imanc' unc'apoujnalá litaiqui' ŁanDios? ¿Te jilpe quipangoyopa? ¿Te ma le'a imanc' olapenufpá ille lataiqui'? ¿Te ma le'a icuaita jilpiya?

³⁷ Łapima nonespa: “Iya' ninprofeta”, o “Iya' linca acueca' lalapi'ipa cal Espíritu Santo”, timetsaicołta' naitsi lalapi'ipa iya' ille laitaiqui' laininił'epolhuo'

jifa'a. He a'i caitaiqui', ma litaiqui' łatPoujna Cristo, tołta'a ticuxe iłque. ³⁸ Ja'ni aimimetsaicojma tołta'a iłque jouc'a aimimetsaicom'me.

³⁹ Unc'aipimaye, camiconalhuo' lonłeyacu. Tołjanajle juaiconapa ti'itsolhuo' to lam profeta. Lapimaye nopalaipá ipaijma liłtaiqui', ne', tipalaile, aimołcuanac'e'mola'. ⁴⁰ Jiłpiya lonlafot'leyołtsi tonłełe ma latenłcocoya ŁanDios, tołcuxetsołtsi al c'a.

15

¹ Unc'aipimaye, itsiya cu'icona'molhuo' te ts'i'ic' loya'apa Lataiqui', małe Lataiqui' lainu'ipolhuo'. He Lataiqui' joupa lolapenufpa, małe lonlihuequi. ² Ja'ni tolihuejle Lataiqui' lainu'ipolhuo' małe Lataiqui' tunłu'elhuo'. Ja'ni aimunłu'eyacolhuo' coła' aicolapenufi Lataiqui'.

³ Laipangopa lainuya'apa jiłpe, ate'a nu'ipolhuo' Lataiqui' lainepenufpa, lu'ipa łatPoujna. Aimipolhuo': "Cristo icupoxi tima'anłe, tołta'a liłonc'e'eponga' lałjunac'. Al Paxi Linilingiya joupa uya'apa tołta'a lo'iya. ⁴ Lijoupa limanapa, eminnapá. Al fane' quitine imaf'inapa. Al Paxi Linilingiya jouc'a tuya'e' tołta'a. ⁵ Imuj'moxi imaf'i'. Pedro ixim'ma. Lijou'ma ixim'me locuenaye liyejmalepá Cristo. ⁶ Lijou'ma mefot'leyołtsi to amaquej maxnu lapimaye ilne jouc'a ixim'me. Hualca ilniya itsiya ailomana' fa'a li'a łamats', joupa imanapola'. Axpela' ti'hua ts'ilmaf'i'. ⁷ Lijou'ma Jacobo ixim'ma. Lijou'ma ixim'me jahuay lan apóstole."

⁸⁻⁹ Ijouco'ma iya' aixim'ma, imuj'moxi pe laifpa'a. Litine lixim'me locuenaye ailopa'a al ts'e

laipitine iya'. Tocomma afule caipajnconna. Iya' aica'onficoyacoxi to locuenaye lan apóstole. Ihiya xonca ac'a xanuc'. Iya' caxinyoxi xonca ninaitsi xans. Iya' caituca' aicainepi'iyoxi ilta'a laipenic'. Caxinyoxi a'ijc'a laipicuejma', nihuetsopola' lixanuc' LanDios lefot'lepola'. ¹⁰ Linca, itsiya ituca' lai'ejma'. Tofta'a li'epa LanDios, itque atpai'ipa iya' laipicuejma', atoc'ipa juaiconapa. Toftiya nulijpola' locuenaye lan apóstole. Xonca ai'epa canic'. Cax'najtsi'i LanDios, itque atoc'ipa. Linca a'i iya' caituca' ai'epa tofta'a, acueca' atoc'ipa LanDios. Toftiya ite lanic' lai'epa tocomma to ma li'epa LanDios. ¹¹ Ja'ni iya', ja'ni locuenaye lan apóstole, ma' anuli Lataiqui' laluya'apa. Maft Lataiqui' lolapenufpa imanc'.

¹² Illanc', ja'ni luya'ayi: “Cristo imaf'inapa, ipayomma pe lomana' limanapola’”, hualca imanc' ¿te coñescopa: “Aimimaf'inayacu limanapola’”? ¹³ Iya' camilhuo': Ja'ni limanapola' aimimaf'inayacu jouc'a Cristo aikuimaf'inghua. ¹⁴ Ja'ni Cristo aikuimaf'inghua, illanc' cofta' ma le'a atpalaiyi, Lataiqui' laluya'apa ailopa'a quipenic'. Ma' anuli, tama of'huaiyijmpá Jesucristo, itque ja'ni cofta' timanghua aimi'iya mitoc'iyacolhuo'.

¹⁵ Joupa lu'ipolhuo': “Tofta, tofta li'epa LanDios, itque imaf'i'inapa Cristo”. Ja'ni cofta' LanDios aimimaf'i'iyacola' limanapola' jouc'a Cristo aikuimaf'i'inghua. Illanc' nafnespa li'epa LanDios cofta' a'ij linca. Ma le'a atfel'mipolhuo'. ¹⁶ Linca ja'ni limanapola' aimimaf'i'inyacola', Cristo a'i quimaf'i'inghua. ¹⁷ Ja'ni Cristo aikuimaf'i'inghua loftjunac' aikuifonge. Tama of'huaiyijmpá Cristo,

ja'ni timanghua, itque aimi'iyá mitoc'iyacolhuo'.
¹⁸ Jouc'a lahpimaye limanapola', tama i'huaiyijmpá
 Cristo itne joupa ejac'pola'. Tołta'a li'ipola' ja'ni
 aikuimaf'inghua Cristo. ¹⁹ Jouc'a illanc', itsiya
 ma'huaiyijnyi Cristo atelcoyi. Ticuaitsi Locuena
 Quitine, ja'ni aimaluyalaico'me xonca al c'a, ¿te
 cal'huaiyijncopa Cristo? Linca ja'ni aimama'iyacu
 xonca ninc'icuanuc'la.

²⁰ Linca, joupa imaf'inapa Cristo. Ticuaihuo
 litine LanDios tefot'le'mola' limanapola',
 timaf'i'ina'mola' itniya. Cristo i'ipa cal te'a
 itniya. ²¹ Li'ipa anuli cal xans aikuiehuejma
 LanDios, tołta'a lamaya i'huajcopa. Totiya ma'
 anuli i'huajcopola' lamaya jahuay lan xanuc'.
 Locuena cal xans ihuejcopa LanDios, tołiya tama
 alma'monga' almafi'ina'monga'. ²² Itque cal xans
 Adán ixingufcopa lamaya, ma' anuli jahuay lan
 xanuc' tixingufcoyi tołta'a. Cristo, itque jouc'a
 i'epoxi xans, imaf'i'inapa LanDios, ma' anuli
 timaf'i'ina'mola' jahuay.

²³ Linca, a'ij nuli lo'iyacola' itne nomaf'i'inyacola'.
 Cristo joupa imaf'i'inapa, itque cal te'a petsi itne
 lafot'leyacola' LanDios. Tijoułta' ticuaicoconno
 Cristo timaf'ina'me lixanuc'. ²⁴ Tijoułta' tixhuaitsi
 jahuay, Cristo ticu'moxi limane, timi'ma LanDios
 qui'Ailli: "Ma' ima' tocuxela'".

Ate'a tilonc'ena'mola' litmane jahuay lan rey,
 jahuay lincuxepá, jahuay no'huapá litmane ni petsi
 lomana'. ²⁵ Cristo ti'hua ticuxe'ma ma mitof'eyołtsi
 no'epaj laic'. Jahuay itniya ti'oc'enam'mola'.
²⁶ Tijoułta' tilonc'e'enatsola' litmane jahuay itne
 no'epaj laic', ma le'a tipanehuo lamaya. Itne jouc'a
 tilonc'e'ena'ma limane.

27 Tołta'a tuya'e' al Paxi Linilingiya, ticua: "T'oc'enapola' jahuay no'epaj laic". Ihe lataiqui' loya'apa "... jahuay i'oc'enapola'", linca aiminescojma ŁanDios. Małque ŁanDios ixpic'epa ti'ila' tołta'a, ti'oc'em'me jahuay, tihuejco'me Cristo. 28 Ticuaitsi litine ti'oc'enle jahuay, tihuejco'me Cristo, małque Cristo hi'Hua ŁanDios ti'oc'ena'moxi. Qui'Ailli' ŁanDios jounpa ixpic'epa jahuay tihuejcołe Cristo. Ti'oc'ena'moxi Cristo, ma ŁanDios ticuxe'ma, jahuay tihuejco'me.

29 Iya' cacua: Ja'ni aimimaf'iyacu limanapola', ¿te quepo'icompola' iłne napo'impola' muya'ayi liłpuftine liłpimaye limanapola'? Ja'ni iłne imanapola' nulemma, ¿te quipenic' iłe lo'epa liłpimaye ts'ilmaf'i'? ¿Te quepo'icompola' muya'ayi liłpuftine iłne liłpimaye limanapola'? ¿Te quitalai'ecopa tołta'a ŁanDios?

30 Iya' jouc'a lałejmale itine itine ałtelcoyi, ałcuayi: ¿Te xonca cal'iyaconga'? Ja'ni aimamałmaf'inayacu, ¿te calsnat'łcopa tołta'a? 31 Itine itine tocomma to ałma'ma, ałma'a'ma. Cacua: Ma' al linca iłe laifnespa. Iya' tixoqui neta capalaicolhuo' imanc' unc'aipimaye loł'huaiyijmpa Jesucristo. Tołta'a aimi'ya cafel'miyacolhuo'. 32 Ja'ni aimimaf'iyacu limanapola', ¿te capanehuo fa'a liłya' Efeso małfulecoyołtsi iłne ti'onłcospola' to oyac'la quinnejá? A'i. Najmay cuyacoła' lapajnya to iłniya nonespá: "Aga mouqui ałmana'monga'. Itsiya, ma małmana', ałtetsołe, ałsnałe al c'a."

33 Imanc' aimołfel'mi'mołtsi. Tolanajtołtsi iłne nonespá: "Limanapola' aimimaf'iyacu". Al linca lataiqui' lonnespa: "Łan c'a xanuc' ja'ni tiyejmalele lixcay xanuc', jouc'a ti'i'mola' ixcay xanuc'".

³⁴ Tołsuej'menca. Tołpai'ile loł'ejma'. Aimoł'econa'me ile pe aimetenłma ŁanDios. Jiłpe timana' ilniya pe aimimetsaicoyi ŁanDios. ¿Te aimołtaiyi calaic'ata mimana' tołniya?

³⁵ Aga tipa'a anuli nonesya: “¿Te co'iya mimaf'inayacu limanapola? ¿Te co'iya micuaiconayacu? ¿Te co'iya liłcuerpo? Joupa ihuet'łpa.” ³⁶ Catalai'e'ma, cami'ma: “Ima' ailopa'a copicuejma’”. Cal fanu' lifampa ate'a tihuet'łqui, tijoułta' tilamma imaf'i'. ³⁷ Ilque cal fanu' lifampa aimi'onłspa to laifa' lolapa. Ma le'a afanu', ja'ni atrigo o ocuena fanu'. Lolapa ituca' lixans. ³⁸ Ma ŁanDios ti'e'e tilala' cal fanu', jouc'a tixpic'e te ts'i'ic' lixans. Anuli anuli cal fanu' tilala' ituca' ituca' lixans laifa' lolapa. Tołta'a lo'iyacola' limanapola' nomaf'inayacu.

³⁹ Fa'a li'a łamats' liłpixic' lan xanuc', liłpixic' linneja, liłpixic' lacał'hui, liłpixic' latuye, ituca' ituca' ilna'a. ⁴⁰ Małmana' fa'a li'a łamats' tipa'a lałcuerpo. Pu'hua locuenaj quitine jouc'a ti'ita ałcuerpo. Lałcuerpo mipa'a fa'a li'a łamats' aimi'onłya pu'hua locuenaj quitine. ⁴¹ Cal 'ora, cal mut'ła, lan xamna, aimi'onłspola'. Ituca' ituca' liłsans, liłpepalc'o'. Lan xamna aimi'onłspola'. Axamna axamna ituca' ituca'.

⁴² Tołta'a lo'iyacola' limanapola'. Litine leminni jiłpe łamats' ilque himanapa ti'hua tihuet'łqui. Litine timaf'i'inla' ti'i'ma ituca'. Aimihuet'łconaya.

⁴³ Litine leminni tocomma to ninaitsi cuerpo. Litine timaf'inala' tipai'im'me, ti'huájta ac'a juaiconapa. Litine leminni ailopa'a co'eya. Aimi'iya. Litine timaf'i'inala' ti'i'ma acueca' ipujfxi, acueca' ti'e'ma. ⁴⁴ Teminni ilque licuerpo

lepi'ipa qui'ailli', itque jouc'a axans. Ituca' licuerpo timaf'i'ina'ma, ite lapi'iya ÆanDios. Tipa'a laŕcuerpo lalapi'iponga' laŕ'ailli', tipa'a laŕcuerpo lalapi'iyaconga' ÆanDios.

⁴⁵ Al Paxi Linilingiya tipalaijma Adán, itque copa'a cal te'a cal xans. Ticua: ÆanDios epi'ipa lipitine, "... toŕta'a i'ipa imaf'i'". Ituca' li'ipa itque ŕecui'impa Æijoujma Adán. Itque ai'a tipajnta ailopa'a quicuerpo, ma tipa'a lipitine. Maŕque lapi'inga' laŕpitine. ⁴⁶ Jifa'a li'a ŕamats', ¿naitsi licuai'ma cal te'a? ¿Itque nalapi'iponga' laŕpitine? Ai. Ate'a tipa'a fa'a itque ŕepi'ipa lipitine ÆanDios, lijou'ma icuai'ma itque nalapi'iponga' laŕpitine. ⁴⁷ Itque Adán copa'a cal xans cal te'a, ÆanDios ilanc'epa fa'a li'a ŕamats'. Ma' amats' ilanc'ecopa. Locuenaj cal xans, itque aŕPoujna, qui'huayomma lema'a. ⁴⁸ Maŕmana' fa'a li'a ŕamats' aŕ'onŕcosponga' to Adán, itque cal te'a laŕtatahuelo, ilanc'ecopa amats'. Locuenaj quitine, illanc' ja'ni ixanuc' itque Li'huayomma lema'a, ma' anuli aŕ'onŕcotonga'. ⁴⁹ Maŕmana' fa'a li'a ŕamats' laŕsans ma' anuli Adán, itque ilanc'ecopa amats'. Locuenaj quitine laŕsans ti'i'ma ma' anuli to lixans itque Li'huayomma lema'a.

⁵⁰ Unc'aipimaye, iya' camilhuo': Aŕcuaitsa locuenaj quitine ticuicomma ti'itsi ituca' laŕcuerpo. Ma to maŕmana' aimi'iya maŕtsuflaiyacu pe locuxeyopa ÆanDios. Ita'a laŕcuerpo tijaf'quinghua, tihuet'ina'ma. ¿Te maŕta'a aŕtsuflaicota petsi ailopa'a mijouya, ailopa'a quihuet'iqui? Ai. Aimi'iya. ⁵¹ Cu'i'molhuo' lo'iya. Ita'a lataiqui' laifnu'iyacolhuo' lan xanuc' quituca' aimi'iya quilsina'.

Ai'a ticuaiyoconno Cristo, tama hualca illanc' ałmana'monga', hualca ałmanecu. Jahuay ałpai'im'monga' lałsans. ⁵² Ite lał'iyaconga', lałpai'iyaconga' aimicołya. Ma le'a to małspot'łmi'me lał'u', mał'huił'f'i'me, joupa ałpai'imponga'. Tołta'a lał'iyaconga' munanni al trompeta, iłe lijoujma luna'apa. Linca tunam'me al trompeta, limanapola' timaf'i'inam'mola', aimihuet'łconayacola' liłcuerpo. Illanc' ja'ni ałmana' ałpai'im'monga' lałsans. ⁵³ Iłta'a laicuerpo tijaf'quinghua, tihuet'ł'ma, ticuicomma lapi'insi ocuena caicuerpo, ałpo'no'entsi iłe pe aimijouya, aimihuet'łconaya. Iłta'a laicuerpo ticuicomma tima'ma. Ipic'a ałpo'no'entsi locuena pe aimimaconaya. ⁵⁴ Tijouła' ti'ıla' tołta'a, iłe litine linca ti'i'ma ituca' lałcuerpo, aimihuet'łconaya, aimimaconaya. Tołta'a tenan'łma lataiqui' linılingiya, ticua:

ıJoupa lulıjpá!

Lamaya joupa ejac'pa, aimalaconayaconga'.

⁵⁵ Ma' al linca loya'apa lataiqui' lonespa:

Catalai'e'ma lamaya, cami:

“Limanapola', ¿ja'ni ma tołta'a tiłmanemma? A'i.

Ima', ¿ja'ni ti'hua toma'ahualecona'ma? A'i.”

⁵⁶ Linca, mipa'a iłta'a lałcuerpo lixingufcopa lixcay lał'epa, ma ti'hua limane lamaya, ałtel'minga', ałma'a'monga'. Aimi'iya małnesyacu: “A'i, aical'aic' quıxcay”. Litaiqui' LanDios loya'apa locuxepa, iłe lataiqui' ałcufquina'. ⁵⁷ X'najtse'eya LanDios, lałPoujna Jesucristo joupa ulıjpa, lamaya aimululıjyaconga' nulemma. Illanc' nał'huaiyijmpá LanDios

jouc'a lulijna'me. Toŧta'a lixpíc'epa ŁanDios, toŧta'a ti'i'ma.

⁵⁸ Unc'aicapimaye, ja'ni toŧta'a laŧ'iyaconga', ¿te ts'i'ic' laŧ'eyacu itsiya? Cu'i'molhuo': Aimolpai'i'me loŧpicuejma'. Tolihuejle litaiqui' Jesucristo. Aimolcuanac'e'moltsi. Itine itine tonŧ'e'me lanic', iŧe lepi'ipolhuo' laŧPoujna, a'ujfxi tonŧ'e'me toŧta'a.

Imanc' noŧ'huaiyijmpá laŧPoujna Jesucristo, monŧ'eyi iŧe lanic' toŧ'nujuaitsa lo'iyacolhuo' locuenaj quitine. Toŧta'a tixojma cunlata tonŧ'e'me lanic'.

16

¹ Itsiya capalaico'ma al tomí lolafot'leyacu lolumme'eyacola' loŧpimaye, iŧne jouc'a i'huexi ŁanDios. Iŧne nomana' liŧya' Jerusalén tehue'ela'. Lapimaye lafoŧyomma łamats' Galacia jounpa ainu'ipola' lo'eyacu. Imanc' ma' anuli tonŧ'eŧe.

² Axamano axamano ticuaitsi al te'a quitine, anuli anuli imanc' tolanajle loŧtomí. Ja'ni ululijpá acueca' tolanajle acueca'. Ja'ni ululijpá huata, tolanajle huata. Cacuaitsi jilpiya jounpa olafot'lepá al tomí. Aimolafot'le'me aquite'.

³ Cacuaitsi, imanc' toŧ'huijŧ'etola' lapimaye titaite iŧe lolapi'iyacola' iŧne loŧtoc'icoyacola' jilpe Jerusalén. Iya' capi'itola' quiŧje'e. Cummetola'.

⁴ Ja'ni ticuicomma ca'huaŧa' jouc'a aŧejmaleta anuli lapimaye.

⁵ Jounpa aixpic'epa cahuejntola' lapimaye nomana' łamats' Macedonia. Tijouŧa' cacuaita pe loŧmana' imanc'. ⁶ Aicaixina' tojua quitine alcoŧta pe loŧmana'. Aga capanehuo jilpiya cuyaicota łaxita quitine. Tijouŧa' cuyaita ni

petsi. Imanc' lacanumf'eta cane, altoc'ita ca'huanla' al c'a. ⁷ Cacia: Ate'a cuyaicota lamats' Macedonia. Tijoula' cacuaita jilpe pe lołmana' imanc' unc'iCorinto. Jilpe a'i ma le'a cuyaicoya. Ja'ni tixpic'eła' LanDios alcolta. ⁸ Jifa'a liłya' Efeso capanehuo tuyaila' al juic Pentecostés. Tijoula' ca'huata pe lołmana'. ⁹ Jifa'a LanDios lapi'ipa acueca' canic'. Axpela' ti'huaiyijnyi łłPoujna. Jouc'a timana' axpela' na'epa laic'.

¹⁰ Ja'ni jilpiya ticuaitsi Timoteo, tolapenufle. Aimolhuos'mi'me. Ma to ca'ay lanic' lalapi'ipa łłPoujna, itque Timoteo jouc'a ti'ay.

¹¹ Aimolatets'i'me, ni anuli imanc'. Tipanni ti'huanla' tolacanumf'entsa cane, ti'huananni pe laifpa'a. Iya' ai'huaijma ticuaiyunca anuli lapimaye.

¹² Apolos aimi'huaya itsiya pe lołmana'. Iya' caxc'ai'i juaiconapa, cami: "To'huala' Corinto. Tonłełe anuli lapimaye." Aimicua mi'huaya. Tipa'a litine mi'hua'ma.

¹³ Aimolšmai'me jilpe lołpicuejma'. Ti'hua tolihuejle Lataiqui'. Aimolpai'i'me lołpicuejma'. Tonł'e'ele acueca' łolunxajma'. ¹⁴ Jahuay lonł'eyacu toł'nujuaitsola' lołpimaye, ja'ni tołta'a tołtoc'i'mola' o a'i.

¹⁵⁻¹⁶ Imanc' olimetsaicola' Estéfnas jouc'a lapimaye nomana' lejutł. Jilpe lamats' Acaya ilne ate'a i'huaiyijmpá Jesucristo. Ilne quiltuca' ixpic'epá titoc'i'me lapimaye, ilniya jouc'a i'huexi LanDios. Ticuicomma imanc' tolihuejco'mola' ilniya, jouc'a tolihuejco'mola' jahuay lapimaye no'epá lanic' juaiconapa, ilne lanic' lalapi'iponga' łłPoujna. Tołta'a caxahue'elhuo' tonł'e'le,

caxc'ai'ilhuo'. ¹⁷ Iya' aixhuełcocopolhuo' juaiconapa. Itsiya tixoqui neta. Licuaina'me fa'a Estéfanos, Fortunato y Acaico, tocomma to olcuai'me imanc'. ¹⁸ Iñe liłonc'e'enapa laipixhujma'. Itsiya aimatsueł'meconayacu iya' imanc'. Imanc' tołimetsaicotsola' iñiya no'epá tołna'a.

¹⁹ Lapimaye lafołyomma jifa'a łamats' Asia tinon-ilhuo'.

Aquila y Priscila jouc'a lapimaye lafołyomma lilejut'ł tixoqui quileta tinonilhuo'. Ticuayi: "Łan xanuc' nomana' Corinto ałpimaye, ał'huaiyijnyi anuli łatPoujna Jesucristo".

²⁰ Jahuay lapimaye nomana' fa'a tinonilhuo'. Jahuay imanc' tołnontsołtsi. Tołtuc'otsoltsi lołpeque ma to mituc'o'oltsi lapimaye, iñe i'huexi ŁanDios.

²¹ Iya' ninPablo canonilhuo'. Iłta'a caituca' ninilcopa laimane.

²² Jiłpe ja'ni tipa'a anuli pe aimi'ay capic'a łatPoujna Jesucristo, tejac'enłe ilque cal xans. ¡Maranatha! Iłta'a lohualquemma: ¡Ima' małPoujna, tohue', to'huanni!

²³ Ti'hua titoc'itsolhuo' jahuay imanc' łatPoujna Jesucristo.

²⁴ Ti'ila' colłsina' ca'elhuo' capic'a imanc' unc'aipimaye, ma' anuli ał'huaiyijnyi Jesucristo. Amén. Tołta'a ti'ila'.

Lataiqui' loya'apa ñe al c'a lixpíc'epa LanDios
New Testament in Chontal, Highland Oaxaca
(MX:chd:Chontal, Highland Oaxaca)

copyright © 1991 Wycliffe Bible Translators, Inc.

Language: Chontal, Highland Oaxaca

Translation by: Wycliffe Bible Translators, Inc.

Chontal, Sierra de Oaxaca [chd], Mexico

Copyright Information

© 1991, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chontal, Highland Oaxaca

© 1991, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 30 Dec 2021

6400fb6e-80e3-5cbe-8b37-1a879c9db6c6